

# Kanpuwa nitutu kirika

VI  
Ciclo

Saberes de los pueblos-Shawi



PERÚ

Ministerio  
de Educación

# La ciudadana y el ciudadano que queremos

Desarrolla procesos autónomos de aprendizaje.

Se **reconoce** como persona valiosa y se identifica con su cultura en diferentes contextos.

**Gestiona** proyectos de manera ética.

**Interpreta** la realidad y toma decisiones con conocimientos matemáticos.

**Propicia** la vida en democracia comprendiendo los procesos históricos y sociales.

**Indaga** y comprende el mundo natural y artificial utilizando conocimientos científicos en diálogo con saberes locales.

## Perfil de egreso

Se **comunica** en su lengua materna, en castellano como segunda lengua y en inglés como lengua extranjera.

**Aprovecha** responsablemente las tecnologías.

**Comprende** y aprecia la dimensión espiritual y religiosa.

**Aprecia** manifestaciones artístico-culturales y crea proyectos de arte.

**Practica** una vida activa y saludable.

**Currículo**  
N a c i o n a l

# Kanpuwa nitutu kirika

VI  
Ciclo





Ministerio de Educación

Dirección General de Educación Básica Alternativa, Interculturalidad Bilingüe  
y de Servicios Educativos en el Ámbito Rural

Dirección de Educación Intercultural Bilingüe

**Kanpuwa nitutu kirika**  
**Saberes de los pueblos-Shawi-VI Ciclo**

©Ministerio de Educación  
Av. De la Arqueología cuadra 2, San Borja  
Lima, Perú  
Teléfono: 615-5800  
[www.gob.pe/minedu](http://www.gob.pe/minedu)

**Primera edición digital, 2021**

**Elaboración de contenido**  
Manuel Pizango Huiñapi, José Púa Pizango

**Revisión lingüística**  
Manuel Pizango Huiñapi

**Asesoría y revisión técnica (Digeibira-DEIB)**  
María Teresa Lavado Y Fernández

**Diseño y diagramación**  
Mercy Kary Bruno López

**Ilustraciones**  
Archivo DEIB-Digeibira

**Cuidado de edición**  
Genaro Rodrigo Quintero Bendezú

Hecho el Depósito Legal en la Biblioteca Nacional del Perú N° 2021-00600.

Todos los derechos reservados. Prohibida la reproducción de este libro por cualquier medio, total o parcialmente, sin permiso expreso de los editores.

Impreso en el Perú/*Printed in Peru*

# Sha'winan

Wa'waru'sa, ihpura kanpita a'chinpeike ya'kunsaramasu ihseke sha'witarankema. Ya'ihpi parihchi nihsha nihsha nananke nunewasupita ihpurawanta nunsarewa', tataru'santa wi'nina a'chintapi nunewasu ama ayatakasumarewe'. A'nahken chini chinihken ya'kanin nunpisupita, a'nahken ihpuraware nuwitapi. Inawatewa kanpuwasu ya'werewa'.

Irahkakeraware piyapiru'sa nahpunin yunkiatuna ya'ipi nu'paruke ma'sharu'sa ya'werinsu tihkimiatusi, na'kun na'kun nararu'sa a'neapi ni'tun ihpura taweriru'sasu chinihken pi'i piikaterin, inami ihpurasu itupi *calentamiento global*. Nahpuatun ihpurasu nararu'sa awimeatuna chiminantapi. Napuatuna yunkimapirinawe kuwachi unputakasuwe ni'tun mahshuru'sa nitutuna'piru'sa yunkipi amatatuna nahtanakaisumare'. Kanpu piyapiru'sa nihsha nihsha nananke nunewasupita nituterewa unpuinsuna nihkatewa naniterewa taweri nuyatakasu', ama ahketeware taweri nitapiwachin nahpunin ya'wekasumarewe. Nahpuatun *Dirección de Educación Intercultural Bilingüe* yunkirin kirikake nishitakasu wa'waru'sa a'chinpeike ya'kunsapisupita nuntatuna nitutakaisumare'.

Kirika nuntumasawatuna tatamahshuru'sa, amipayaru'sa, iyamahshuru'sa, ahpimahshuru'sa sha'witatuna nahtanku yunkirinsu sha'wichinkenma unpuinta nanitere nihkakasu ama ahketeware taweri nitapikasumarewe'. Nani kikika nunteramakeran manutawatuma yunkiarama taweri acha'ekasumare'. Inamare ihu kanpunanke nishitarai.



# A'nunan

Piyapi wankeñani ka'taninsu' .....	8
Panka nararu'sa a'shini ya'weterinsu' .....	15
Shunshu ira ku ahketamarewe a'chinsapirinwe'.....	18
Shawi piyapi yu'naturashiri yu'natakasu a'chinterinsu' .....	22
We'enke tukanike chinirupi maninsu.....	27
Inin uhshitewatera nunteresu' .....	32
Ya'wari u'nan perarinsu' .....	35
A'netuwatera iwan sha'witeresu' .....	37
Tehshiru'pa uhkuiresu' .....	39
Piahtera tehshimare manesu' .....	41
Ma'ma shahkakasumare nunteresu'.....	43
A'netu shunira nunteresu' .....	45
Pi'ihpi taweri a'tenesu' .....	47
Wi'napi yuhkaterinsu' .....	49
Inairaru'sa u'nani a'piterinsu'.....	54
Tehshi pi'iri nukurinsu' .....	57
Wa'wa a'shini a'piterinsu' .....	59

Imianatuwatera wankawa nukurinu sahkateri' .....	61
U'un ma'sharu'sari u'urinsu'.....	63
Tanan nimiru a'shinen ya'weterin .....	65
Nu'wan akañurinsu .....	68
Shihku ira pi'iru'teke .....	69
Atari wa'ante perarinsu' .....	71
Shuhkuru peraantuwachinpu .....	73
Wa'nateresupita ayunkirinpu nitutakasumare' .....	74
Tame wa'nawatera .....	80
We'enuke anashi kenanpatera.....	82
Anashi anawaru akurinsu' .....	84
Wene wa'nawatera .....	86
Ta'mu wa'nawatera .....	88
Mayu wa'nawatera.....	93
Sanapi su'ine pa'sarinsu wa'nawatera.....	95
U'yapi mahsaresu wa'nawatera.....	97
Mahki, shimpa inapita irusaresu wa'nawatera.....	99
Ninunentaresu wa'nawatera .....	101
Tayurarun ma'sha a'chinsapirinwe'.....	107
Anahshi kemapi mi'sene niawepisu'.....	110



A'na ninanua'wa ahkupuru pa'marinsu' .....	113
Pakuni piyapiru'sa tihkirinsu' .....	119
Kahtu wi'napiru'sari Kunpanama ushipisu' .....	125
Irahka shawi piyapiru'sa amana nuntupisu' .....	130
Nihsha nihsha kañuru'sa nunenakasu' .....	134
Ya'wan ketewachinpura shihpi kanunanke ninunenesu' .....	139
Sanapi washirun nihpachina natiu u'urinsu' .....	141
Kahpari nuhkakeran nimiru ninesu' .....	144
Ananankeran nimiru ninesu' .....	146
Anawahkake ninunenesu' .....	152
Ahtekeran nimiru ninesu' .....	154
Sha'wehpatera penaninke ninunenesu' .....	158

## Piyapi wankeñani ka'taninsu'

rahka a'na piyapi sa'in, wi'ninpita inapitare ahke tananke tanputatun ya'werin. Nahpuru nuhtuwaru ka'nanu'sa, anpiantewanu'sa, nantewanu'sa, ni'niru'sa ya'werin. Nahpuatun i'waraya nihpachina sehtuchinachin nuhtuwaru yu'win peratun nunkarurin. A'ka'yanpuchin nuhtuwaru suchiri perarinsu nahtane'. Ina piyapisu nahtanpachina pa'yaterin.



Inapuchin nihipirinwe, sahkatenen kankantahpatun ku tananke paatun ma'sha tehparinwe. A'na taweri tanan yapa'tupinwe ku ahkete kahpari ya'weterinwe ni'tun ku tananke pa'ninwe'. Nahpuatun, kumanta sa'in, wi'ninpita a'kaatunwe i'shanake pe'ikaisu yunkirin.

A'nataweri nani tawerisapasu kemapisu we'erinkeran wenseintasawatun sa'in nuntatun iterin: “Nani paya tawerisarin, ihpura kumanta kapasu ya'weterinpuwe, pa'a nihpachi i'shana pe'itate ayura'wateranta mahkate ka'a”, iterin. Inapuchin ninuntatuna nunasui nani tawerisu wi'tunterisarin.

Nani taweripachina kemapisu sa'ini wenu u'shiterinsu u'usawatun sa'in iterin: “Pa'a paya ahkawa senate tananke kepate i'shana pe'ita'a”, iterin sa'in nuntatun. Ninaputatuna pa'pi ahkawa senapi, pahsapi, inakeran tananke pa'piwachi. Nahpuru sa'insu panta'pi a'itawatun su'pinin tananke kepakasumare', pe'iwachina samira kehshatuna pu'uhtakaisumare'.



Ahkemiachin pa'sawatuna a'na i'shana kenankunpi, ninitupirinawe nuya samiri ya'wetuwachina ahkawa keparinsu mahsawatun uhkuchiana pu'muterin. Ina i'shana pe'itatuna wa'se, ayu, pehsante ikiana, shi'wiru inapita mahpi. Nuyamiachin samira'waru'sa nu'piarin ni'tun wi'ninpitasa a'shine pe'nate pa'mapi. Ya'were kemapisu uhsharan pa'matun pawitehramasarin.

Pawitehramasu kiraman pentunsarin kenanin. Ina kenanutun irahpa mahsawatun, pa'nin kiraman imarin. Pakapunchin kiraman i'narinsu iruika ihpiterasarin anuhkantakasumare, inaran shinpanin kenankunatun nuntatun iterin muhshateke ahpira kemari kiraman a'sunsaran iterasarin. Inautatun imaraasu wankupi kenankunatun a'napisa inanatun tehparin.

Nani kiraman tehparawatun shinpaninke tunpusawatun pe'pesawatun u'mapirinwe sa'insu i'shanake wa'winpitare wanitun nuhtetarin kenankimarin.



l'shanake sa'in kenansawatun, kiraman akusawatun iterin: “Paya, kiraman tehparawe, pa'a ihpurasu pa'ma'awachi”, iterin sa'in nuntatun. Nahpuatun ira imahkimatuna u' masapirinawe wankupi nahtankimapirinawe ira u' masapasu parichi tun, tun, tun-tun, tun, tun, shuwiiiiii tuhsarin ni'tun uhsharan u' masahpatuna wankupi ni'kimapirinawe ihchu narase'pake wenseatun napuahrin kenankimapi. Ihchusu nimintu ni'tun kayuhken aweatun napusarin kenankimapi. Ni'pirinawe piyapi kenansawatun nara se'pa ta'atatun wenten, wenten tarin. Ina wa'waru'sa nihkatuna yahshin yahshin tewapi. Wa'waru'sari tewarin ni'tun ihchunta ahketechachin niwa'yanterin, awenen se'warin, muhten ihterin, neweterin nahpusarin ni'tun wa'waru'sari tewatuna nunkarutupi. Inapusapunawe mayura'wake kayuhken nihsatatun chinihken shuiii tuhsawatun nu'pake anuterin. Ina ni'sawatuna wa'waru'sasu ya'kariatuna ni'pirinawe te'nerawanen nihshiteterin ni'tun tantunte te'nera'wa nihkatuna tewapi.

Wa'waru'sari tewasarin nit'un pa'pini nu'wipirinwe ku nahtetupiwe. Ihchu tewarapikeran u' masahpatuna peike kankimapi. Samira mahpisu pu'mutuna ka'pi, wenu u'uhpi, inapatuna nani tashi nihpachina ihpuraware yawe'ehsapirinawe, ahchin ira we'shimapisu parichi aupu'u perarin nahtanpi. Napuatun mashusu tenin: ¿Unpuatunta ihpuraware pu'u peratun napusarin? ¿Nayuwatamarinpuatii?, tenin. Wa'kimiachin nihsapasu a'nanta inaparihchichachin peraantarin. Wa'kiran nihsapasu nuhtuwaru pu'uru'sa perahsapi nahtanpiwachi.

Napuatun mashusu wi'ninpita iterin: ¿Ihchu tewarama nitun suhpai wa'yantamarinpuatii?, ta'tun nahtanasu, wa'kimiachin nihsapasu tanankeran nuhtuwaru nihsha nihsha pu'u perahsapi. Inakeran nahtanpirinawe tanan wanerenterin nahtanpi.





Nahpuru wi'ninpitasi a'shine nimahsawatuna ta'api. Ya'were mahshusu ka'tantunu'sa perahsarinkeran inanta ta'arin. Nani ahke pa'sawatuna nahtanpirinawe ira we'shipisu parihchi pu'uru'sa perarin nahtanpi. Pu'uru'sari piyapi imahsarin. Nahpuwachina nahkeranchachin mahshusu ka'tanturu'sa perahsarinkeran sa'in, wi'ninpita sha'witawatun ta'antapi.

Ahke papunapuchin a'na iminke pei kankuntapi. Ina peike kankuntasawatuna nahtanpirinawe', sakuhsin perarinsu nahtanpi, nani ira we'shisapi. Nahpuru nahtanpirinawe panka nara pantarinsu ina narake'paran wankeñansu peratun an, an, an, ka' ka' ka' ka', an, an, an, ka' ka' ka' ka', tuhsarin nahtanpi.

Ina mahshu nahtansawatun tenin: *“Pa'a shishamashu kahtapakui, kiyasu nihpirinwe anarasarai”*, iterin. Wa'kimiachin nihsapasu nahkeranchachin an, an, an, ka' ka' ka' ka', an, an, an, ka' ka' ka' ka', taantamarin. Inaran nahtanpirinawe tuhpinan tanan tanawantahrin, ku pu'uru'santa perarinwewachi. Nahpuatun tenin: *“Manuyacha wankeniansupaya, kahtawarinpua”*. *“Ku inawe nihpuni, kanpuwasu anara'iterewawe, tenin sa'in, wi'ninpita nuntatun.*


Imin wankuana peita'wake wensechinachin taweriwachina, pantapirinawe nuhtuwaru ni'niru'sa i'irateke i'narinsupita kenankuntapi. Inaran ni'pirinawe ni'nira, kushi, atari inapita pe'tawapisu ni'niri pe'yatun nansehkensachin paterin.

Nahpuatun yunkiatuna napupi: *“Inpichin ku ta'arewawe', kanpuwatan anaraiterewawe”*, tuhpi ninuntatuna'.





Inake mashusu yunkiatur wi'ninpita sha'witatur penenin: “Ama tanpawanu'sa kenanpatama tewakusuwe', ama narintukusuwe’”. “Inasu nihpirinwe a'shinen ya'weterin ni'tun ku nuyayahterawe narintakasu”. “Suhpairi a'piterin”. “Narintuwatera a'naruahchin suhpairi naniterin tehpausu ya'werin”. “Nihsawatun tahshi tanan pa'tuwatama', wankeñan perasarin nahtanpatama sha'wituku kahtapainkema', ama suhpairi ya'karitamarewe’”. “Nihpunawe ama narintusuwe’”. “Inasu narintuwatera yarani tarasawatun pe'yarinpu', kuwachi kahtaparinpuwe’”, tenin mashuya shiinpita penenatur. Napupi mashuru'sa sha'wituna'.





## Panka nararu'sa a'shini ya'weterinsu'

rahkakeraware mahshuru'sa nunpachinara napupi: “Kanpuawasu ya'werewake panku tanan tawirapiterinpuwa ya'werewa”.

Panku tananu'sake nihsha nihsha nararu'sa wanirantarin kenane'. A'shianu tananke pi'winchu, pi'wasu, shiwaku, shu'nan, wa'senan, yamutun, unkuñan inapita wanirantarin kenane'. Tachi nararu'sa wankuana ninan wanirantarin. Ya'pi nararu'sa a'shinen ya'weterin, nihpunawe ku akañurinpuawe.

Ninanchasu a'shinen a'naruahchin yaakañurinpu. Ninansu nihpirinwe panku ya'wanu'sari yakaparin. Nahpuatun a'na taweri kanpura tananke pa'patera nihsha nihsha irininsu nahtane'. Ahkete tahshi tananke pa'patera nihsha nihsha suhpa irininsu nahtane'.

Ya'ipichachin mahshuru'sa napupi, nuhtuwaru ninan wanirantawachina, inake ya'wan ninan ka'taninsu ya'werin. Panku ninanu'sa wanirantapachina te'watupi ya'karikaisu, ninansu nihpirinwe nu'nu ya'wan, yu'win ya'wan, anu ya'wan inapitari ya'weterin ni'tun ku nuyawe ya'karikasu'.

Nahpuatun tatamahshuru'sasu wi'ninpita, shiinpita penenpachinara napupi: tanan pa'tuwatama ama unpuuteranta ninankuteke chi'chikusuwe, ama iyakusuwe, inake chi'chipatama ninan a'shinen akañusarinkema'. Ninan akañuwachinpuwa wahkansawate chimine'.





Nahpuatun ku nuyawe ninan kuteke, iyakasu, chi'chikasu'.

Ninansu nihpirinwe ma'pita suhpairi ya'wetumara, nahpuatun kunuyawe ya'karikasu'.

Sanapi kayurun nihpachina, ku naniterinwe ninan wanirinsu parihchi paakasu'. Inake pa'pachin ninan a'shini naniterin akañukasu'.

Kemapiru'santa tanan pa'tuwachinara ku nanitupiwe ninankuteke we'ekaisu'. Ninankuteke wa'ehpachina inapiyapi sha'pitawatun inaran wahkasawatun naniterin chiminakasu'. Nahpuatun tataru'sasu wi'ninpitare tananke pa'pachina inawita wi'ninpita sha'witerin, inawanta nitutakaisumare'. Na'kun ninan wanirinke iminpatera shaaru'sa ku nuyaterinwe, wa'yanenkeran iyatuwachina shaaru'sa awisawatun tahkirin. Ke'shasu nihpirinwe yunpira tararin, panta'pisu nuhtuwaru shunihtawatun tahkirin.

Panka nararu'sa wanirantarinke nishsha nihsha suhpairu'sa ya'werin. Nahpuatun wankana tanake we'ehpatera nihsha nihsha suhpai irinunsu nahatane'. Inapuchin nihpirinwe ku naniterewe narintakasu'. Tahshi nihpachina nuhtuwaru wentunkarin nahtane', tanan kunpiwan, nuwaya'wan, yaraya'wan ninan se'pake nisu'wihsawatun napusarin. Inasu nihpirinwe ninan a'shinen itupi.



## Shunshu ira ku ahketamarewe a'chinsapirinwe'

rahkakeraware mahshuru'sa sha'wituna napupi. Muhtupi parihchi imiwanpatera, uhsaratakasu nihpachina ahkemiachin muhtupi nanpetate pa'ne uhsaratari. Nahpuatun, iminke pa'patera irake shunshu i'narinsu kenane'. A'na taweri sanapi nanun wa'yantupachina werun mahsawatun nahseramesawatun irake paterin kenane'. Ina sanapisu ni'pachina mawi'napita nahpurin nihka, tenin.


Sanapi iminke pa'pachina mutupi nanpetatun nuhtuwaru kanuhtu u'warin. Nahpuatun sanapi nuhsurunenke shunshusu ira aya'karitakasu yunkirin. Shunsu nihpirinwe sanapi nuntakasu nuwantupirinwe, ku naniterinwe inauraichin kenanakasu. Sanapisu iminke pa'pachina kainpita sha'witerin ka'tanakaisumare'.



Nahpauatun ku naniterinwe shunshuri ya'nutakasu'. A'na taweri muhtupike sanapi ninapirinwe, nahpuru taweri sanapisu ku iminke pa'ninwe'. Inapuchin nihpirinwe, sanapi nuwantunenke ya'pichachin piyapiru'sa nuhsurukasu yunkirin. Nahpuatun a'na mahshuyanta kahtapatun ahke nihpirinwe shunshuri ira piwisawatun a'parin ni'tun mahshuyasu ku ahke iraterinwe'. A'nahkenmaresu pa'pi ahke nihpirinwe mahshuyarisu ku ahketerinwe'.

Irahkachachinsu nihpirinwe, tatamahshuru'sa shirinkake sahkatapuna iratatuna Nuyanpake'pa kankuntapi. Shiwiruparihchikeranware nantipike pe'petawatuna iratuwachinara kara tawerikeran Nuyanpake'pa kankuntapi. Nuyanpake'pa kankuntapirinawe ahke ni'tun nuhtuwaru ikirupi. Ahke iratatuna nupanantemahshurachin nihkunpi. Inapuchin nihkatuna naniyuhkike shiwirukeraware Nuyanpake'pa pa'pachinara na'kun muhtupi nanpetatuna iratupi. Pe'petu kepaatuna ira kepatatuna Nuyanpake'pa kankuntapi. Nani pe'tu akuuntasawatuna ya'wepike u'mantapi. Nahpurapatuna nuhtuwaru sa'harachin, nupananterachin nihkunpi. Nahpuru a'na mahshusu nuhtuwaru nupanantetapunawe uhshahkerasn muhtupi pa'tuntahsu a'hawitarisu patupi.

Nahpuatun mashusu uhsharan muhtupi nanpetatun na'nehrasu shunshuri ya'nuterin. Shunshusu nihpirinwe nuwitapuna chanchari itupi. Inasu nihpirinwe piyapimashu, pankamashu tanpaterin, panka tananke, muhtupike, tu'yanpiru'sake ya'werin. Nahpuru mahshusu shunshuri kenanatun iterin: ěIntuhparanta iyara kemasu wekatun na'nehriaran?, iterin. Naputuwachina chinihkenmiachin kankantawatun a'panitun iterin: Shiwiru parichikeran Nuyanpake'pa pe'petu kesahpirawe, kehken ni'tun uhsharan wekatu na'nehriarawe, nahpusawatu nupanantetumantarawe, ya'ihpi sa'narawe, iterin.



Napuwachina shunhsuri itapun: ¿Ma'ninkenta kemasu'?, iterin ni'tun tatamahshusu a'panitatun tenin: Kahsu nihpirinwe chanchariku, tenin. Naputuwachina shunshusu tenin: Nahpuakeware, chanchari piyapinken ni'keware kanpusu iyanpu', itawatun a'na tanpakeran wanere, ute itawatun pe'pesawatun sha'wanen irakeware akurin ni'tun ni'pirinwe a'na ira sha'wain sha'wain nihsarin kenankuntarin, inasu nihpirinwe chanchun ira, itupi.

Naputawatun sha'witerin tanshikasumare'. Nani tanshiwachina, shunshurisu pe'pesawatun a'naruahchin nuyanpa ya'kari chi'yakuntarin.




Nahpuatun mahshusu a'anaruahchin Nuyanpa'pa kankuntarin.  
Nihshisu nipachina yunkirarinkeran we'ehpirinwe panka  
piyapimahshuri wekapaisawatun iterin: Karinkensu  
nuhsuruatenken kepatanranken, ama piyapiru'sa sha'wiketewe'.  
Ihsupuchin nirarawekeran a'nataweri iya ya'karisha akusarawe,  
ama piyapiru'sa parisehtakaisumarewe'. Titerin we'enke.  
Nahpuru mahshusu kahpayatatun yunkisaharin.

Taweririnkesu nani yau'mantawachina irake shunshuri tu'shiteantarin.  
Mahshu ni'tun uhsharan u'masu shunshuri ya'nutatun inari  
kemantarin. Nanpuatun a'naruahchin ya'werinke kankimantarin.

Shunshuri ama sha'wikamarewe sha'witerin ni'tun ku  
sha'wipirinwe. linpitari nahtanatuna muhshasahpi ni'tun  
nu'pisawatun sha'wirin. Nahpuatun shunshuri ya'nutatun  
iterin: Inamini kashu kanpita nuhsuruatenkema nahpuapirawe  
kemasu sha'wiran ni'tun atahpananku. Ihpurasu ahke iratatumu  
intuwasuna yunkiramasu inahtuwa kankasarama', iterin.

Nahpuatunchina ihpurasu ahke iraterewa intuwanta yapa'patera, tuhpi  
mahshuru'sa. Mashuyanta ku sha'wirinwe nahpuniri ihpurawanta  
kanpuwasu ku ahke irachiteriwawe. Pe'petunta kepaesu ku ahke  
pe'peiterewawe, tuhpi mahshuru'sa ihpurawanta ahke iratuwachinara.

Napuatuna mahshurusasu wi'ninpita penenpi tananke ma'sha  
kenanpatama, tahshi wa'natuwatama ama  
a'naruahchin sha'wikuwe, tuhpi.



## Shawi piyapi yu'naturashiri yu'natakasu a'chinterinsu'

rahkaraware mahshuru'sa sha'wituna napupi. Irahkachisuna nihka shawi piyapiru'sa ku nitutupiwe yu'natakasu. Nuhtuwaru sami ya'wepirinwe ku unpu mahkaisuwe ni'tun ku sami mahpiwe. Nahpuatun na'kun sehtupirinawe, a'nataweri a'na mahshusu we'ehpirinwe wa'narin paatun yu'naturashi sha'witakasumare inari a'chintakasumare'. Nahpuatun mahshusu we'erinkeran wenseintaratun yu'naturashi piyapi nihkapun nihkakasumare pa'nin.

Ira pa'tumasawatun i'shanake'pa kamapirinwe ku yu'naturashi kenanatunwe yunsan pa'tumatun pe'nate pa'marin. Kahtu kunimiachin i'shana pa'tumasawatun nuhtupirinwe yu'naturashi yu'natatun yunsanke wanirarin kenanin. Kenamasawatun iterin: *iahpuria'wa!*, *kanta kema nihkapenken we'sarawe. ¿Unpuatunta kemahsu inapuchin yu'nateran? ¿Ku'chi kiyasu naniteraiwepaya? Nahpuatun we'sarawe pa'a kanta a'chintuku kemahpuchin kanta yu'nachi, iterin.*

Inake, yu'naturashiri taweretawatun iterin: *iNuyapa! Ihpurasu ahpira tatamahshuchachin perahsarawe ina a'chintarinken nituyu'natamasu'.*

Naputarinkeran yu'nana awaniitawatun pi'pian i'sha kahtensawatun petete parihchi uhpururin. Wa'kimiachin nihsapasu nuhtuwaru tahshirutawatun muhpi parihchi wira chaintunin. Wa'kimiachin nihsapasu ahke ahketchachin wira wanerantarin, inaran nuhtuwaturu u'nan tenenterin. Inaupachina, yu'naturashisu mahshuya nuhtesawatun iterin: *nahtanke ahpurimahshu napusarin.*








Ina awantunwatan nahpuruware nituyu'nataran.  
Ahpira ahpurimahshu ishake amatarinken, iterin.

Yu'naturashisu napusawatun uwateanake wanusu wa'kimiachin  
nihsapasu chinihken u'nanatun wiraiterin.

Nahpuru mahshuyasu wira te'watatun uwateanake yana'ipirinwe  
yu'naturashiri sha'witerin ama na'ikasumarewe'. Nahpuatun i'ke  
waniitawatun u'nan amarin. Nahpuru chinihken wira awaterin.



Wa'kimiachin nihsapasu u'nan sanumasawatun me'tarin.  
Nahpuru yu'naturashisu uwateanakeran pihpisawatun ka'pi  
masawatun piyapi urutatun uhpuruterin. Inake iterin, ihpurasu  
ya'weranke pantawatan sha'wike inawanta nitu yu'nachina.  
Yu'natuwatama ama tuhpinan pakusuwe, ka yunkiatumaku  
yu'natuku. Nahpuru sami ku te'watarinkemawe.

Nihsawatun, ama sami, narintukusuwe, ama sami ya'nipitukusuwe.  
Sami narintuwatama, ya'nipituwatama tatamahshu nu'wituwachin  
a'naruahchin u'nan a'pasarin. Nihsawatun kuwachi mahtarinwe.  
Ku yamahtuwachinwe anpu nusawatuma yu'nanake irintu  
irintu itatuma ka yu'naturahshiku ituku', iterin.

Inapihkeran iterin: Ihpura kanpusu yu'natuna'pi taransare itawatun  
peinenke a'paintarin. Ya'were yu'naturashisu pe'nate yu'natapun  
paantarin, pa'pi nituterin yu'natakasu'. Nahpuatun yu'naturashisu  
yu'natuwachina nuhtuwaru sami uwararin. Irahka yu'naturashi  
piyapi nihakapun papi pa'yaterin yu'natakasu. Nahpuatun a'shininsu  
pa'yatunenke sami akitatun, pihshatatun, chinpitatun ka'nin.  
Nahpuatun ku tanakeran ya'werinwe, yu'naturashisu nihpirinwe  
nani taweri i'sha yunsankeahchin wanirin yu'natakasumare'.

Napurarinkeran a'na sanapi kenanin. A'nataweri yu'natapun  
pa'nikeran kuwachi peinenke wentarinwe, nahpuatun a'shinsu  
pa'yanatun yunirarinkeran kenanin a'na peike ya'weahrin.  
Pa'awachi panta'a itupirinwe sanapi kenanatun ku nuwanterinwe  
peinenke pantakasu'. Nahpuatun a'shini yu'wisawatun patuntarin  
ni'tun sehterarinkeran inaira taransawatun pa'nin, kuwachi  
peike pantarinwe. Ihpurawanta yunsaana ya'weterin.





Nahpuatun yu'natari pa'patera yu'naturashi yunkirasare,  
yu'naturahipuchin nihkate yu'nakasumare'. I'shanake yu'natari  
pa'neke yu'naturashi kenanpatera ku narinterewe, ku na'pirake  
te'yararewe'. Yu'naturashi pinewachinpura kumanta sami uwararewe'.  
A'na taweri tuhpinan u'mare'. Ihpuraware yu'natawachina sami  
uwararinsu ku a'naruhchin a'kapiwe ama nipe'tentamarewe'.

Nahpuatun a'nahken tataru'sasu kemapia'wa wi'nin nihpachina nani  
yuhkia'waraike i'ke wi'nin kepaatun amaterin. Yu'naturahshipuchin  
kemasu nihkamake itatun amaterin. Wa'washakeraware kemapia'wa  
inaputuwachinara, yu'natuwachina na'kun sami uwararin.



## We'enke tukanike chinirupi maninsu

rahkakeraware shawi piyapiru'sasu tuken taweri panitakaisu nichpachina, yunkipi ninunenakaisu chinikaisumare, inamare nihsha nihshake ihsatupi. Inamre tananke pa'sawatuna ma'sha yunihpunapuchin kara taweri tananke i'watatuna ninunenpi chinikaisumare'. Ninunenakaisumare tananke pa'pachinara ahke pa'sawatuna wankana tananke we'emetupi, inake ma'sha yunihpunapuchin ninunensawatuna na'tupi.

Tananke ya'werin nihsha nihsha chini wa'wiraru'sa mahkatuna ihsatupi. Wa'wira ihsaterapikera we'ehkeya nitutupi shiku tumanke ihsatakaisumare'. Inaurapikera nitutupi tukani tumake ihsatakaisu. Inamare ahke tananke pa'sawatuna we'emetupi, inake ma'sha yunihpunapuchin ihsatupi.



Inapuatuna kemapiterai tuhpi irahka mahshuru'sa. Nahpuatun mahshuru'sasu tuhpi, irahkachachinsu nihpirinwe ku ya'kariya ma'sha tehpaatuna ka'piwe. Nahpuatun mashuru'sasu muhtupiparihchi tanan pa'tupi, inake we'emetatuna ninunenakaisumare'.

Ninunenpachinara ku tananmareachin ninunenpiwe, panitakaisumarenta ninunenpi. Nahpuatun, a'na taweri muhtupike we'emetakaisu yunkiatuna pa'sahpirinawe, ahke pakapunapuchin wankupi ni'ni kenankuntapi. Ira yunsankeran warun tawatun irakechachin ni'nimahshu wanikiran. Nahpuatun ihpuraware yainansapirinawe, a'naruahchin tanan ta'aterin. Muhtupikesu nihpirinwe nuhtuwaru ni'ni ya'werin ni'tun ina te'watanuna ku ahke nipatupiwe.

Nani tanpunenake kankuntasawatuna kunpaine ninuntatuna napupi: Kunpasha, a'na ira kemanta pa'teke, ya'were kanta a'na ira pa'tarawe, tuhpi ninuntatuna'. Taweririnkesu kunpaine wenseintasawatuna tananke pa'pi. Tananke papunapuchin shi'nianpi, maya inapita u'karisawatuna tanan pa'tupi.

A'na kunpainsu a'naruahchin mahpin kenanatun tehpasawatun tanpunenke u'mantaran. A'nasu ku pahkariterinwe, iwarayaware u'marin. U'marawatun kunpain iterin: Kahpa kunpa kahsu, kumanta kenanawe, itenin. Kumanta tehpaatunwe yunkiantarin tawerinke paantakasu'. Nani taweriwachina inanta tananke paatun yu, ihte, kiraman inapita kenankunatun tehparin. Ina tehparawatun tanpunenke u'marin. Nahpuru taweri muhtupike tukani kenanin.




Tawerikiantarinke nahkeranchachin paantapi. A'na kunpainsu i'waraya nihsapasu tanpunenke u'marin. Ya'were a'na kumpainsu nani i'waraya nihpirinwe ku pahkahriteriwe'. Nihpachina, kunpainsu yunkiatun tenin: ¿Intuwata kunpasu pa'nin? ¿Ahipira kunpa u'mapun nimarati?, tenin.

Nahpuru taweri i'waraya u'makaisu ni'tun yunkiatun napurarin. Kunpasha u'mawachin i'warayateranta pa'ma'i. Nani ihpura wenuwachi nihpi. Napuatun pu'sapirinwe a'nasuwachi ku pahkariterinwe'. Naniwachi a'na kunpainsu nuhtuwaru ma'sha tehparin. Nihpirinwe kunpainsu ku pahkariterinwe ni'tun wenseatun ninasahrin.

Nahpuatun tenin: ¿Unpurincha kunpa nihkaya, ya'wanamarati? Tenin.

Nani u'makaisu taweri ni'tun a'nasu yunkirin ahkemiachin paatun suru tehpakasu. Nahpuatun ahke pa'sawatun kahtu panen nanpetawatun, nuwaramasawatun pa'marin tanantapun. Inakeran panen ne'pekuntarawatun nuhtekuntapirinwe', panenke a'na nara wanirawatun pankita itewanin. Ina narakuteanake wenseatun chinuhtapirinwe, kanuhtatun pi'pian tanshi tanshisahrin.

Muhtupi nanpetatun kanuhtatun pi'pian chinu chinuta'i ta'tun, narakuteanake chinuhterinkeran we'ehsapirinwe, wa'kimiachin nihsapasu tukani we'sawatun nara se'pansawatun inake awepirinwe, narakuteri ya'kuwirin ni'tun ku nikiterinwe. Nihsawatun piyapinta inaura te'wanenke ta'chasawatun tuhpinan nahtantahrin. Kumanta tuhpachinawe tukanisu ya'winkasawatun amashachin pa'nin.




Yata'apirinwe tukani teh pawachinku ta'tun ku ya'winkarinwe.  
Wa'kimiachin nihsapasu nahkeranchachin wenantasawatun narake  
aweantapirinwe, piyapisu tuhpinan tanshiatun nahtantahrin.  
Inapuasu kunpainsu ira imatun muhtupipa kankuntasarin.  
Unpurinta kasu kunpawe ta'tun nuya pa'yanatun ira imatun  
yunkiterantasarin, ahkeran nuhtepirinwe, tukaniri narake  
aweaturun yatehpasarin ni'kuntarin. Napuatun, nuya pa'yanatun  
ni'pirinwe kunpainsu narakuteanake wenseahrin. Nahpuatun  
yainanpirinwe kunpawe inanpatu ta'tun ku inaninwe.

Wa'kimiachin nihsapasu tukanisu nahkeranchachin ya'winkasawatun  
tawan pa'tumanatarin. Nahpuwachina, manutawatun kunpain  
mahkunsawatun a'naruahchin ira ta'atiimarin. Ahkemiachin  
we'sawatun nahtanpirinwe nani tukanisu panenke'pa  
nanpeintasawatun inake peraturun wanerentarin. Nahpuwachina  
i'shanake kankimasawatuna i'sha ta'atupi. Wankupikera  
nunshisawatuna ira pahshitetatuna tanpunenake kankimapi.  
Nahpuru tawerichachin ya'wepike u'mapiwachi. Tahshware  
nani kamasawatun ma'sha tehparinsu sa'in ketiimarin, inaran  
we'ehpirinwe, panka tukanimashuri wekapairin wa'narin.

Nahpuwachina we'enke tukanire niawepi. Inakechina nihka nani  
tukaniri mishasapirinwe, wa'kimiachin nihsapasu ni'pirinwe  
kunpaini kahtapasarin wa'narin. Inaranchi nihka tukaniri itapun:  
¿Chiniterankuti?, ku chiniranwe nahpuni, kemasu karinken  
tehpasawatenken muhtupi kepachitenkenwe, chinitatunku  
chaetheranku. Ihpurasu karinken piwisaranken kaahpuchin kemanta  
chinhken piyapi nihke'. Itawatun uhpurutatun pushhh, pushhh iterin.  
Inaranchina nihka ni'pirinwe kunpainsu wanitun ni'sahrin kenanin.  
Nahpuatun ihpurawanta yapanituwachinara ihsa mahsawatuna  
tukani yunkiatuna ihsatupi. Tukani tumake ihsatuwachinara  
a'na yuhkipuchin na'tupi. Nahpuatun tukanipuchin chinipi.







## Inin uhshitewatera nunteresu'

rahka tatamahshuru'sa napupi sha'wipachinara, ininsu nihpirinwe wa'yanen ya'weterin. Ya'ipi nararu'sa wa'yanen ya'wetupi, nahpuatun a'na taweri ku sha'witarirawe mahpatera ku nuyawe ni'ninpu'.

Nahpuatun, inin uhshitekasu nihpachina, ku pahpinanke uhshiterewe. Ahchinpuchin wenseintasawate wenu u'ure, inaran a'nipitate ka'ne, sa'ya mane inaran pa'newachi inin nuwiteresu uhshitekasumare'. Nani na'kun inin ya'werinke kankunpatera, uhshahkeran pa'sawate nuya chinisawate a'naruahchin wententate ushitere'.

Ama ninin tachitun nihkamarewe, wententaripuchin shinpanin sha'witere', inaran ama chinikewe i'su chinpitarinken itere'. Nahpuru a'naruahchin nuhshiteterin. I'suchina wa'yanenkeran inin chinpitawatun wihpachina a'naruahchin ininta nuhshiteterin.

A'nahken tatamahshuru'sa napupi: Ninin wententupirewe tachituwachin itere: Ama tachitekesuwe mayu tunpuapu, ama tachitekesuwe mayu tunpuapu, mayu tunpuapu, mayu tunpuapu itere'. Tuhpi mahshuru'sa sha'wituna'. Naputuwatwachina ininsu wa'yanenkeran a'naruahchin nuhshiteterin mayu tunpukasumare'.

Inin uhshitewatera ku inanhpuchachin uhshiterewe, kahturin nihpun, kararin nihpun tanawitere'. Inanhpuchachin uhshitewatera wa'yanenkeran pinerinpu'. Inin pinewachinpura wa'wahsha nihkarirawe nuhtuwaru ihpatetere'. Nahpuatun inin uhshitewatera nuya yunkiate uhshitere'. Nani peike kenkimasawate, peenke awenukatawate a'naruahchin i'shurine, inaran tahparewachi, u'nanpachina nahpuruware mahsawate i'me ninewachi.



Inin uhshitekasu nihpachin, yuhki ni'ne'. Yuhkia'warai nihpachina ku inin uhshiterewe, ama a'naruahchin mukakasumarewe'.

A'nahken inin wiririntun ya'werin, a'nahken sha'piyunktun, yarayuntun inawita ya'werin. I'me nihkakasu nihpachina, sha'piyuntun wayunsawate uhshitere'. Inanpi ininsu nihpirinwe a'shianu panperu tananke ya'werin. Peimare nihpachina yara inin uhshitere', inanpi ininsu nihpirinwe shinaru tananke ya'werin. Inin ya'werinke nihpachina nuhtuwaru i'su ya'werin. Nahpuatun ku naniterewe ahkete imintakasu'.

Ihpurawanta ya'werewake peikaisumare, i'me nihkakaisumare inin uhshitepi. Ininke peiwatera wakirin, ku a'naruahchin mukarinwe. Nahpuatun, winin uhshitekasu nihpachina nuya yunkisawate uhshitere', tuhpi mahshuru'sa.





## Ya'wari u'nan perarinsu'



U'nanakasu nihpachina nuhtuwaru ya'wari pihpisawatun ira pa'terin. Nahpuatun ira pa'tuwatera ya'wari kenane'. Panka u'nanakasu nihpachina nuhtuwaru ya'wari tanan yanketerin. Nahpuru inairaru'sa ihteshira, shahkaka, chinsha inawita kahpa kankantatuna ya'wari imahsapi kuhkara, ihsenpi, shu'mi, yuru, ipeskate inawita pihpituna ta'apisu kapakaisumare'.

Peike ya'wari ya'kunpachina inasu nihpirinwe payu nu'wakasumare'. Nahpuatun nuhtuwaru ya'wari pihpisawatun pei parihchi ya'karitawachina, amahshamiachin pa'sawate inaira pinitere'. Ina ya'wari nahtanpachina a'na parihchi taweresawatun nihsha pa'nin.

Ya'wari kenansawate iyatuwatera nahpuru tawerichachin chinihken u'nanin. Nihsawatun kuwachi ira pa'terinwe'. Nihpunawe, kanpusu ihkin iyare'. Napuatun ku nuyawe ya'wari iyatakasu. A'nataweri we'enke ya'wari ketesarinken wa'napatan inasu nihpirinwe ku nuyawe. Inapuchin wa'napunawe tanan pa'tuwatan nahpuru taweri ya'wan ketesarinken.

Nahpuatun inapuchin wa'napatan a'naruahchin wenseintasatun piyapiru'sa sha'witeke'. Nahpuru ya'wan tahpanpachin ku ketesarinkenwe. Manuyasu ya'werisu ninutatun inapuchin sha'witerinpu, nahpuatun ku nuyawe ya'wari wa'nakasu. Ya'wari wa'napatan a'naruahchin weseintasawatun na'pimuhtu iyateke'. Ma'pitasuna wa'naransu yunkiatun sha'witeke'.






## A'netuwatera iwan sha'witeresu'

**A**'shianu tanan iminpatera nararu'sa nihke nihke nukuterinsu ya'werin. Nahpuatun nara a'newatera ama a'na parihchi anutakasumarewe wisuwan sha'witere'. Insechinsuna anutakasu nuwanteresu, inataechachin nuhtesawate piwike piwike wisuwan itaripuchin a'nesare'.

Nahpuru wa'kimiachin nihsapasu chinihkenmiachin wisuwantawatun insechinsuna anutakasu nuwanteresu ina parihchi wisuwantarin. Nahpusawachina naranta a'naruahchin nupantawatun anuterin. Panka naramashu, tachitun nararu'sa nihpachina iwan, wisuwan sha'witere'. Pi'wasu, tenera, shiwaku, pi'winchu, shu'nan inapitasu nihpirinwe tachitun nararu'sa.

Nahputun a'newatera ku a'naruahchin a'nuterinwe, inapuwachina wisuwan sha'witere. Wa'kimiachin nihsapasu chinihken wisuwantawatun nara tachitun nihpirinwe upanatan ahtaterin. Nahpuatun na'kun piyapiru'sa a'netawachinara nisha'witupi, ama narari awekasumarewe'. A'nataweri kanpura a'netahpirewe nara tachitun ni'tun ku a'naruahchin anutuwachinawe, pankamiachin niwakitawate weshimare'.

Nani yaweshimawatera wisuwan sha'witawate u'marewachi. Nahpuru tahshi chinihken iwan pa'sawatun inari ahtaterinwachi.







## Tehshiru'pa uhkuiresu'

rahka mamapayaru'sa napupi tehshiru'pa yamahpachina ama a'shini apirakasumarewe'. Tehshiru'pa uhkuikasu nihpachina, pa'ne insehkesuna ya'werinsu ina nuwituchinsare'. Nani nuwituwatera tawerinke tahshiramiachin ku ahkete wenu u'urirawe pa'newachi. Insehkesuna tehshiru'pa ya'werinsu nani ya'kariwatera uhshakera ninuntate pa'pe, ama nu'pa a'shini pu'ukasumarewe'.

Sanapi kayurun nihpachina ku pa'ninwe, ama nu'pa tapikasumarewe'. Inapuchachin sanapi su'yawan nihpachina uhsha nininkeran ku pa'ninwe ama nu'pa a'shini imeatun wa'win pu'ukasumarewe'. Uhsha nihpikeran nu'pa ya'kuntatuna mahpachinara a'narauahchin nu'pa ayarin. Nihsawatun tehshituwachinara a'narauahchin nuhpaterin.

Nani nu'pa ya'werinke kankunpatera yunisawate iware'. Nu'pa iwaaripuchin itere': ashirin, nu'pa a'nutuku, ashirin, nu'pa a'nutuku, itare'. A'na taweri aipihsha nu'pa kenane'. Nuya nahtetawate pa'patera ahkuwe iwaakeware nu'pa kenane'. Nu'pa ashini pu'uwachina pupin yunihpirewe kuwachi kenanewe'. A'nataweri nu'pateensachin kenane'. Inapuwachina a'na parihchi paate yuniantare'.

Ya'werin nihsha nihsha nu'pa. A'nasu tehshiru'pa, a'nasu a'hituru'pa. A'shituru'pasu nihpirinwe ihpura kenansapatera kaninchin kaninchin, inasu nihpirinwe a'siante a'shitakaisumare'. Ya'were tehshituru'pasu nihpirinwe wiriwirutumiachin.






## Piahtera tehshimare manesu'

**S**anapiru'sa tehshitakaisu nihpachina yunkipi piahtera sha'weteen mahkatuna suhkara nihkakaisu, nihpirinwe sanapiru'sasu ku naniterinwe imuhtuke nara sha'wete mahkaku'. Nahpuatun a'na kemapi sha'witerin inari imuhtuke nihpatatun sha'weteen matakasumare'. Piyahtera mahkaku nihpachina ku wenu na'kun u'uhpiwe ama suhkara nitapikasumarewe. Suhkara nitapiwachina tehshi nuhpaterin. Nahpuatun ku ahketeke u'uhpiwe'. Kemapi uhsha nininkeran piyahtera mahpachin, tehshi nuhpatarin. Nahpuatun, piyahtera mahkakaisu yunkiwachinara ku uhsha nihpiwe'.

Nani piyahtera sha'wete mahpachinara peike kemasawatuna pi'ihke a'wintupi. Nani nuya yanisha'wetewachina, nuyawantapasu aipiranke imusawatuna a'pepi. Nani panka peen tenentapasu utaratupi, nahpuru peen sanumasawatun peyara kihparitumarin. Ina peyara te'nawachina, yuntunsawatuna nantiwiki, kuhtaruke tahpapiwachi.

Inapuchin nihpirinwe, ihpurasu kuwachi ahkete piyahtera ya'werinwe, piyapiru'sa na'ahsawatuna iminatuna ni'kisapi. Inapuchin nihpirinwe ahke paatuna uhshatuwachinara kenanatuna sha'weteen matupi.

A'na taweri chinihken u'nanpachina, nahpuru suhkara tahpapisu mahsawatuna pe'sanpi. Nani pe'sanpachinara, nahpuru nu'pa mahpisu ayutawatuna nanitupi tehshitakaisu'. Sanapiru'sari suhka pe'sanin, sanapichachin tehshitaantarin. Kemapiru'sasu ku tehshiterinwe.





## Ma'ma shahkakasumare nunteresu'

rahkakerawe tatamahshuru'sa, mamapayaru'sa a' chinatuna sha'wipachinara napupi, shahkakasumare ma'sharaya mahpatera, ma'sha senakasumare nihpachina nuntakasu ya'werin. Ma'ma sha'patera turu kayu, uwaka tuna, pawara tuna inawita yunkiaripuchin ni'nunake nu'pa umaate sha'ne'. Inaputate ma'ma sha'patera, ma'manta pankapisachin iware', tuhpi mamapayaru'sa. Ya'ipichahcin shaaru'sa ya'pirin, naranen, nunirintenin inapita yasha'patera nuntere'. U'yapinta i'waraya shahkaripuchin nuntere yahpurisha nihtakasumare', ama tachitunwe nihkakasumare'. Kusu inaputuwatrawe u'yapinta pa'pi nahpurupi wanirin, nihsawatun pa'pi tachitun ninin.

Mayu nanseke u'yapi sha'patera nani nihtuwachina pa'pi tachitun. Nahpuatun uhkuna'pi se'pake u'yapi sha'ne'. Sawanike u'yapi sha'patera nuhtuwaru nawanterin.

Nahpuatun ihpurawanta sanapiru'sa ma'ma iwapachinara, inawita yunkiatuna ma'ma iwapi. Inaputatuna iminke ma'ma sha'pi. Nani ma'ma sha'pisu pihkeran i'yu, shiwa, kenen, ayu inawita kuwachi ka'piwe, ama wa'yanenkeran munuhken pe'yatakasumarewe'. Nahpuru taweri ma'mamia, manshan, yara ma'ma, ipi ma'ma inawita sha'ne'.

Nani pi'ihpi taweri nihpachina nahpuru ma'ma tahkirantarin. Nahpuru taweri ma'ma iwapatera pankapisachin uhkuiate a'itate ka'ne'. A'na pihkeran ma'ma ihkanterinpu'. Mamapayaru'sa napupi: Ma'ma taweri nihpachina, pi'i a'na parihchikeran tawerekintarin, ama ma'ma ka'pikeran ya'yatakaisumarewe'. Tuhpi mamapayaru'sa sha'wituna.





## A'netu shunira nunteresu'

**K**anpuwasu ya'werewake iminatewa kusharu ya'weterinpuwa. Ke'sha, panta'pi inawita shahkaku yunkiwatera, nani pi'i mahkintasawachina nu'pa kunitawate imianatere'. A'naruahchin tihkikas yunkiwatera kemupinenpu sha'witere inawita kahtapawachin pura imiana tihkisawate wa'wira a'neantare'. Inaputate nararu'sa yaminayansachin nininsu a'here', pankan ninsupita kanpura ku nanitaparewe ni'tun nahkeranchachin piyapi sha'witaantare'.

Panka narasachin a'nekasu nihpachina, panka piyapisachin nitu sahkatupisachin sha'witere'. Nani inawita shawitawate pa'ne nara pe'saterapiari, ama piyapiru'sa mairesupita pe'satetatuna wa'kikaisumarewe'. Matawerisuna a'netakasu yunkiresu, nahpuru taweri tahshiramiachin piyapiru'sa mairesu peike pa'pi, inake akushatawate u'shitere'. Inaran imin wa'anen tenin: pa'awawachi, ku'wara ahkete pi'i wankuwiteriara, tuh-pachina piyapiru'sa imuhtu mahsawatuna pa'piwachi.

Nani iminke kankunsawatuna imin wa'anen tenin: inta ihpura kemapichachin a'netu shunirapuchin nihkatewa panka nara a'nera'awati, tuhsarinkeran piyapi nara a'nuterin. Nahpuru piyapiru'sa kahtu kahtu nimahsawatuna pe'sateke nanpeuntapi nara a'nekaisumare'. Pa'pi pankan nihpachina, kahtawini piyapi nihsawatuna pe'sate nanpetupi.



Napuru a'naya a'naya a'netu shunira, wenshinshi, shihku, yarani inawita yunkisapikeran, pe'sateke nanpeuntasawatuna nara shihka ta'pauntapi. Napusapikeran tuhpi: Ni'kuchi a'netu shunirasu ku piyapipuchin imuhtu ya'wetupirinwe naniterin a'netakasu, ahkete kanpuwasu nani imuhtu nuya tu'narewa, ahpihpura kanpuwanta a'netu shunirapuchin nihkatewa a'netarewa', wenshinshipuchin, shihkupuchin, yaranipuchin chinihken piyapi nihkatewa a'netarewa', tuhpi ninuntatuna.





## Pi'ihpi taweri a'tenesu'

rahkaraware mamapayaru'sasu aminpita sha'wituwachinara napupi, nani pi'i marintasapasu imianatuwatera inare naniwavhi nuya yanihpachina i'chinpitakasu yunkiwatera shinate, pihkirate, u'yapi munu, u'yapite', kayunan munu yanime inapita inawita yuntunate a'wintere yanihshin yanihshin nihkakasumare'. Naniwachi nuya yanihpachina taweririnke nani yakamutesapasu kara piyapi sha'witawate ku amarirawe, ku u'urirawe pa'newachi imin i'chinpitakasumare'.

Nani iminke kankunsawate kamuhtechin nihsapasu pi'i ne'pesawate itere': Wisun wisun shisha. Wisun wisun shisha; wisun wisun shisha itarekeran shinate, pihkirate, u'yapi munu, u'yapite', kayunan munu yanime inawita keparesu i'chinpisawate imin pahketerewachi. Naputuwatera ahketchahcin pi'i peenpuchin nenerin. Inapusapachina ahke ahke i'chinpiterasare. Nahpuru taweri ku amarewe.

I'chinpitaripuchin wisun wisun shisha. Wisun wisun shisha. Wisun wisun shisha itare'. Naputawatera chinihken wisuwantuwachina ahketchachin peen uruhterin. Ama wihkitamarewe, ku imin wankana pa'newe, intun pa'tuntaate imin i'chinpiterantasare'. Inaputate imin i'chinpituwatera ya'ipichachin wihkirin.

A'nahken nuya amasawatuna, nuya u'usawatuna imin i'chinpitapuna pa'pachinara, ku imin inahpuchachin wihkirinwe. Nihsawatun ku shishamashu perahpachinaraiwe ku wisunterinwe'. Imin ku wihkiwachinawe, tahshirayapuchin paatuna intetupi. Nahpuruware nanitere sha'takasu'. Nanhpuatun mamapayaru'sasu ihpurawanta pa'sarawe a'tenapu tuhpi nunpachinara. Pi'ihpi wankanaitasapasu, nani wankanasapasu i'chinpiwachinara a'tene tuhpi.






## Wi'napi yuhkaterinsu'

rahka tatamahshuru'sa sha'wipachinara napupi, irahkasu ya'werin a'na wi'napi anawatemahshu, chiruhtemahshu ni'tun ku make naniterinwe. A'na tawer tanan pa'tupirinwe ku manta naniterinwe ma'sha ka'nanu'sa, anpiantewanu'sa kenanakasu. Nihsawatun pa'pi we'eite nihkunin. Tananke pa'pachina wankupi pehtunan te'yatawatun nara kuteke nite'yatatun inake we'erarinkeran nani i'wasapachina peinenke u'mantarin. Nahpuwachina kumanta kenaninwe. A'na taweri tanake we'ehsarin ni'tun shunari nuhtuwaru waituwachina shunahsachin peinenke u'marin.

Nahpuatun kankan yunkiatun sehtatun na'nerin. Sahkatumarenta ku naniterinwe, iminke pa'pachina a'naruahchin yawe'erin, nenteri nuhtuwaru yamuterin. A'na taweri iminke pa'pachina chirutun nara kuteanake wenserinkeran we'erin. Inake shunari, nenteri, kankan, yanetere inawitari yamuterin.

Nahpuatun, sanapiru'sari yanpiatuna nu'wipi, ku insu sanapiteranta nuwantupiwe nuntakaisu. Nahpuwachina a'shini, pa'pini inawitari nuhsuruatuna shinpan, ananan, shiwarin, shinpite inawita mahsawatuna a'itawatuna inake pe'patupi. Inake nani i'waraya pehpatatuna kara taweri ananipi. Nani kara taweri ananiwachina, pa'pin tananake pa'sawatun shi'nianpi itehken mahsawatun kemarin. Tawerinke tahshiramiachin i'ke winin kepasawatun, shi'nianpi ite maninsu ina iwirawatun au'kariterin. Nahpuru nuhtuwaru imapiru nitenenkeran te'yaterin. Na'nepirinwe, pa'pini ama wa'wa na'nekewe', awanteke iterin winin. Inaputatun kara taweri ananirin.



Ina ananiwachina, pa'pin iminke pa'sawatun kahpari nuhka senarin. Peike kemasawatun sa'yaterawake pu'musawatun tahparin. Taweririnke tahshiramiachin nihsapasu nahkeranchachin wi'nin winanke kepasawatun, inake winin nuhka keterin wenukasumare'. Nuhka wenutun na'nepirinwe pa'pini ama wa'wa na'netunwe awanteke iterin pa'pini ni'tun awantawatun nuhka wenurin. Nahpuatun nuhtuwaru imapiru te'yaterin.

Pa'pini nunenpachina kuwachi nuhka, yamura ka'ninwe; nihsawatun ku pi'i nahtaninwe, ku main wenu u'urinwe. Nahpuru pa'pini tananke a'parin ni'tun pa'pirinwe, ku ahkeyaterawe iratapunchin nahtankunpirinwe nuhtuwaru anpiantewanu'sa kushatatun pa'karusapi nahtanin. Ina nahtansawatun uhshakeran paatun ni'kunpirinwe, chinsha, wiriunte, pa'para inawita inapake kushatarin kenanin. Nu'paruke ni'pirinwe winka, yunse, yunkurun inawita kushaterin kenanin. Nahpuru pehtunanke inanatun chinsha, pa'para, yunkurun inawita tehparin.

Nahpuatun kankan yunkimasawatun kahpa kankanterin. Ma'sha tehparinsu mahsawatun sa'yahke pu'murin, inaran amashamiachin paantapirinwe, wankupi nahtankunpirinwe nuhtuwaru ihchu wanukaruriarin nahtanin. Ina nahtansawatun ira ta'atuntasawatun ne'pepirinwe a'na ihchumashu yahpurimiachin wensesarin kenanin. Ina ni'sawatun ihchu pahkuituwatera kuwachi naniterewe tehpakasu tuhpiura ta'tun, nuya yunkimasawatun pehtunanke iwehterinsu ihchu yu'namentaechin chu' iterin. Wa'kimiachin nihsapasu ihchumashu shuwi shuwi shuwi tuhsarinkeran nu'pake anuterin. Ina mahsawatun peike u'marinwachi.





Nani peike kankimawachina pa'pini iterin: Ni'kechi wa'wa yuhkataranwachi, inapuatemini kemapinpu yuhkatere, iterin pa'pini nuntatun. Nahpuru kuwachi yawe'erinwe, ku nenteri, amanshuri inawitari yamuterinwe. Nihsawatun iminke sahkatakasu yunkirin.



Nahpuatun ma'sha tehpaatun kapakasu yunkirin. Ina ni'sawatun a'shin nuya kankanterin. A'na taweri irahpa mahsawatun tananke paatarinke ku ahkeyahterawe pakapunchin nahtankunpirinwe, kiraman pentunsarin nahtanin. Ina nahtansawatun tu'shitepirinwe, nuhtuwaru kiraman we'sarin ni'tun, a'nasa nuya iwehtawatun inanin. Ina inansawatun nuhteantapirinwe, a'nanta weantamarin kenanin, inanta irahpake iwehtatun inaanterin. Kahtupi kiraman inatanun kahpa kankanterin. Nahpuatun uhsharan chi'yatehrimasawatun peike kankimarin.





## Inairaru'sa u'nani a'piterinsu'

'sha yunsanke nihsha nihsha inairaru'sa ya'werin, sasa, pamaturashi, yunkuyu, arasu, wishiruku inawita yunsaanake ya'werin. Inawasu nihpirinwe u'nani, iwani a'piterin. Nahpuatun a'na taweri wa'waru'sari narintatuna na'pirake, nu'pake te'yarapachinara, a'naruahchin pi'iru'te tahshisawatun u'nanin. Ku nihpun chinihken iwan pa'nin. Nahpuatun ku nuyawe te'yarakasu'.



Pi'ihpi taweri nihpachina tahshiramiachin sasa, pamaturashi, yunkuyu, arasu, wishiruku inawita yunsaanake peratuna nunkarupi. Ina mahshuru'sa natanpachinara ahketchachin pi'ihsharin nahtankechi inairaru'sa napupi peratuna, tenin inairaru'sa perarinsu nahtanpachinara.







Inairaru'sa perarinsu mahshuru'sasu nahtapachinra, mahshu kapini ninuntatuna napupi: Inairaru'sa nuyawan ninutun perahsarin ni'kuare, pa'awa i'sha yunsanke tahparutatewa mahkira, nanpiyun inawita sha'awa'. Inachasu nani senarewasu pihkeran nahkeranchachin u'nan aipitiinantaran. Nahpuru i'sharu'sa pamataantaran, tuhpi mahshuru'sa ninuntatuna.

Inararu'sa perarinsu nahtanpachinara, piyapiru'sa ya'wepike tuhpi: Ihpura inairaru'sa nuyawan ninutun napuarin ni'kuare pa'awa tarahpa, yu'nana, semurin, yunan inawita anuyatatewa wairu ninawa, we'pachin sami mahkatewa kapaewa', tuhpi ninuntatuna'. Nahpuatun, nani wairu kankiwachina tarahpatupi, yu'natupi inapuatuna kushatupi.



## Tehshi pi'iri nukurinsu'

rahkakeraware mamapayaru'sa aminpita, wa'winpita nuntupachinan tehshi pi'iri nukurinsu sha'witupi. A'nataweri yuhki nihpachina wenseatuna nituturu'sa amipyu sha'wipachina nahtane'. Sanapiru'sa tehshitakaisu nihpachinara u'nan me'taike senan, urinan, yuusha, we'ehta inapita nihpachinara pi'ihke a'wintupi.

Nani tehshitatuna senan, we'ehta, urinan, mine, yunsha inapita nihkatuna tenipachinara, aipiranke kepamasawatuna pi'i sha'witupi, chinihken pi'katatun tehshiru'sa ayanirayatakasumare'. Pi'i ya nuntupachinara sanapiru'santa nuyahsha a'muasawatuna, nuwatawatuna aipiranke pihpisawatuna pi'i nuntatuna itupi: Nuhka kapatun kapatun uhspuruke shisha, nuhka kapatun kapatun uhspuruke shisha ituwachinara wa'kimiachin nihsapasu pi'inta kewain kewain a'pinsawatun chinihken pi'katerin.



Pi'i nuntatuna naputapikera, pi'i ne'peatuna sha'witapunapuchin yayaruke, kanpianuke inapita mahsawatuna pahshitupi. Mine, yunsha, urinan inawitasu ahkuwenante nininsu yayaruke pahshitawatuna aipke kanpianuke pahshitupi. Ya'were we'ehta, senan inapitasu aipisachin yayaruke pahshitupi, ahkuwenanteensu ku pahshitupiwe'. Nani tehshiru'sa pahshituwachinara, pi'wasu sha'wete, anpinian sha'wete, pi'tateru'sa, shiwaku sha'wete inapita mahpisu inake nuyahsha payurapisawatuna 'chinpirapitupi. Nahpuru nuhtuwaru peen tenenentuwachina tehshiru'santa pi'irayarin. Sanapi kayun nihpachina sha'witupi ama se'wakasumarewe'. Kayuruni se'wapachina a'naruahchin tehshi nuhpaterin.




## Wa'wa a'shini a'piterinsu'

**K**anpuwasu ya'werewake irahkaraware tatamahshuru'sa mamaparu'sa ha'wipachinara wa'wa a'shini ya'weterinsu sha'wipi. Nani chimiwa'yan yakaritapasu u'nahpi kañaritawachina wa'wa nuhtuwaru sunuanteru'sake, i'shananteru'sake perarinsu nahtane'.

A'na taweri panka u'nansawatun sunuantera'waru'sa mentaituwachina, nahpuru wa'wa sunuanteru nuwarasawatun perarin. Ina nahtanpatera ya'weresukupini nisha'witawate pa'ne wa'wa mahkakasumare'.

Nihshirata paate nani kankunpatera, amuru mahsawate se'numusawate shihpiru parihchi uhpurure', ama wa'wa wa'yantiinpusumarewe'. Nihsawatun ku chinihken nunewe', ku narinterewe nunkarukasu'. Chinihken nunpatera a'naruahchin wa'wa wa'yaterinpu'. Nahpuatun ku narinterewe'.



A'nahken winahshiruteru'sa ni'tun wa'wa narintuwatera, kahtu kahtu nipe'pesawatuna nu'pake anutapi, inaran nahtanpirewe narapuchin anuterin nahtane'. Wa'kimiachin nihsapasu nahtanpirewe, piyapipuchin chinihken uutunin nahtane'. Inapuchin nahtanpatera kuwachi ninarewe'. Inasu nihpirinwe suhpai napusarin. Ina awantawate ahketechachin wa'wa mahsawatera, wa'yan awerinpu'.

Ninanua'wake ya'wepatera, tanpuke ya'wepata wa'wa perarinsu taweri nihpachina ku kanpura pa'newe, kemupinenpu sha'witawate inare'kenpu pa'ne wa'wa mahkari.



## Imianatuwatera wankawa nukurinpu sahkaterere'

**W**ankawasu nihpirinwe ya'wan kenpachina ku tenururinwe, tu'terantenkeran mahpachina uhshite uhshite itawatun nara se'pake a'miterin inake yanihpachin kapakasumre'. A'nataweri inaputawatun wankawapaya nihpachin wa'winpita kepaterin. Ya'were wa'antemahshu nihpachin wi'ninpita kepatarin.

Nahpuatun mahshuru'sasu ihpurawanta wi'ninpita sha'witupi imianatapuna yapa'china nani imiana nuhtekunsawatuna wankawa peratuna sha'witakaisumare. Imianatapunapuchin wankawa yunkirantasapi, nahpuru ya'wanu'santa wapitawatuna nihke ya'wikapi ni'tun ku kenanewe'.



A'nataweri pa'pi nuniteraru nihpirinwe ku suhpai kenanewe'.  
A'nataweri shihpiru imine', a'nataweri shinararu imine'. Aruse  
shahkakasu nihpachina shihpiru, nuniteraru nininsu imine'.  
Inapuchinke iminpatera a'nataweri nañantate ku wankawa  
yunkiwatrawe nuhtuwaru ya'wan ya'werin kenane'. A'nahkensu  
imianatapuna yapa'pachinara uria munuke, uhkunapi munuke,  
ananan munuke nipehpatawatun pa'nin imianapun.

Inaputuwatera ku ya'wan keterinpuwe, inaran nani imianake  
kankunpatera, chinhken narakute awesate itere': Ya'winkakena  
ya'wan, ama kema suhpainken tu'shitekusuwe, karinkensu  
kenanpatenken ku tenerusarankenwe, itere'. Nuputuwatera kuwachi  
ya'wan kenanewe'. Ina nahtansawatun ya'wan ta'arinwachi.

Nahpuatun ya'wanu'santa wapituwachinara ta'apiwachi.





## U'un ma'sharu'sari u'urinsu'

**P**i'ihpi taweri nihpachina nihsha nihsha ka'nanu'sa, yu, ipi, pawara, te'nesha'we inawita mahpinu'sa nihpisupita u'unke aipitupi. A'na taweri u'un nawihpire nuhtuwaru mahpinu'sari u'uhpachina, ninate ma'sha tehpakasu yunkire'.

Nahpuatun inapuchin kenanpatera, ahkemiachin pa'sawate nara nihshitetere, minten su'wite mane, inawita mahsawate kemasawate u'un pe'saterapire. Pe'satetaripuchin ku mahpin yunkirewe, ama wa'wirari sha'witakasumare'. Nihsawatun ku shinpaninke pe'sate tunputerewe, ama shinpanini sha'witakasumare'.



Shinpanini sha'wituwachina a'na taweri ninatupirewe ku mahpin wekapairinpuwe'. Nahpuatun ku shinpaninke uyunewe'.

Nani pe'saterapisawate ahkemiachin paterewachi.  
Ahkemiachin pa'sawate winka, yunkurun inawita perarinsu tahshisapasu wanipare'. Naniwachi kanchise ura nihsapasu pa'newachi u'un pe'saterapiresu ninakasumare.

Nuhtuwaru ma'sharu'sari u'uhpachina, ku wa'ki wenserewe, a'naruahchin mahpin we'nin u'unke u'uhpun. Ipi shu'mi ina'tun we'sarin, nani ipi shu'mi nukitapasu, wa'kimiachin nihsapasu ipi we'sarin. Ya'were yusu nihpirinwe nani ihpuraware yunutashisapasu nahpuruware ya'karitarin.

Yu we'pachina ku chinihken irininwe, uhshahkeran wenin.

Panka u'unke nihpachina, ku kanpura wenserewe, inakesu nani yunutahshi nihsapasu muhtute, chanchun inawita we'sarin u'unke i'sha u'ukasumare'. Nani taweriya'kari nihpachina, nahpuruware te'nesha'we warunteriarin nahtane'. Nahpuwachina te'nesha'we tehpare'.



## Tanan nimiriu a'shinen ya'weterin

**T**ananke nimiruru'sa ya'werinsupitasu nihpirinwe a'shinen ya'wetupi. Nahpuatun uhkuikasu nihpachina, ahchinpuchin wenseintasawate ku piyapi nuntarirawe tananke pa'ne. Nani kantunsawate sunamenke nukusawate nuntere ama apitatiinpusumarewe'. Ya'were ku inapuchin nihpaterawe kuwachi kaña'pi nuneninwe. Ya'ipi tanan nimiruru'sa na'keran uhkuire'. Ya'werin tanan nimiriu yanen materesu, ya'werin a'nahken werunen matere, itenen, sha'weteen inapita nahkate nunenamen nihkaku ya'werin.



Tunu nu'wihken uhkuikasu nihpachina, kankunsawate sha'witatre itere': Tatamashu, ihpura kemamare we'sarawe, shia'waru'sa kañutuna sha'pituunin nihkunpi ni'tun we'sarawe, kemari nunenatun anuyateke, itere'.




Naputawate pi'i we'sapakeran, pi'i ya'kunsapakeran sawenike awere'. Inaputate nu'wihken pa'chike a'nite matere'. Nihpunawe kuantu ira yunsanke manewe. Ira yunsankesu nihpirinwe piyapiru'sari nihkatuna nihkatuna na'wetapi, inasu nihpirinwe ku nuneninpuwe'. Nahpuatun ku piyapi pa'ninkewe peshunsawate yunire nu'tenain nu'tenain ninsu pe'tere nu'wihken matakasuamre'. Nani nu'wihken ananisawate, peike u'marewachi.

Nani peike kankimasawate nu'pa iwaate inake pa'pitere. Nahpuruware nanitere u'ukasu, kushatakasu. Ku inaputuwaterawe kañuresu ku nuyaterewe'. Nani kanchise taweri nihpachina, nahpuruware uhkuisawate u'urewachi.

Nani tunu u'ukasu nihpachina a'na mahshuya nitu u'shirinsu sha'witere u'shitiinpusumare'. Nani u'uresu pihkeran na'takasu ya'werin. Ku na'tuwaterawe nanitere wahkansawate chimine'. Ku nuyawe mahkira kapakasu, kashinu'sa ku nuyawe kapakasu. Tunu u'uhpunawe uhsha nihpachin a'naruahchin wahkasawatun chiminsarin.

Nahpuatun mahshuru'sasu nuya penenpi wi'napia'waru'sa, nanua'waru'sa nani tunu u'uhpisu pihkeran ama uhsha nihkaisumarewe'. Nahpuatun kemapi nahsha sa'ahsapachina ku nuya tunu u'shikatasu', naniterin nañantawatun tewetuwachin, chiminakasu'. Nahpuatun nuya penenchinsare'. Nahpuwachina a'nahkensu kuwachi nuwatupiwe u'ukaisu'.



Tunu u'uhpisu pihkeran ku nuyawe pi'ihke iratasu. Pi'ihke iratuwata a'naruahchin kemanmuhtusawate a'naruahchin sukimuhture'.

Piyapi na'kun na'kun sha'pituwachina, uhchankiwachina, kanuhtuwachina tunu u'shitere'. A'nahken piyapi nu'pa kapatun chunkairayapachina tunu u'shitere imuatun inkikasumare'.



## Nu'wan akañurinpusu

**N**uyawan taweri nihsapasu nani i'waraya nihpachina, pi'i we'sapasu inaran pi'i ya'kunsapasu parihchi pi'iru'te tanpianawanin. Inapuwachina tatamahshuru'sa, mamapyaru'sa inawitasu shia'wainpita, aminpita nuntatun napupi: Ni'kuchi kanpitanta nu'wan pihpirin, amachi kampitanta aipiranke pa'sahkuwe nu'wan akañuchima', tuhpi.

Nu'wanchi nihka irahka piyapi nihkapun u'yapi shahkaku pa'yaterin. Nahpuatunchina nani u'yapi kanunan nirantapachina ina paa'yatatun tanpianawanin. Tatamahshuru'sa, mamapyaru'sa ina ni'pachina napupi: Naniwachi u'yapi nihtakasu ya'karitarin, napuatun nu'wan sha'witun nahpusarin, tuhpi nunatuna'.

A'nahken mapayaru'sa, nu'wan i'waraya pihpirinsu ni'pachinara napupi: —Insu sanapita keyurunapun, nu'wan pihpiwachina sanapi keyunakasumare', tuhpi nunatuna'. Nahpuatun nu'wan pihcpiwachina sanapiru'sari ku ni'piwe, ama nu'wani nihkakasumarewe'.



## Shihku ira pi'iru'teke


**T**atamahshuru'sa, mamapayaru'sa Nuyawan taweri nihpachina tatamashuru'sa, i'irateke pihpisawatuna inake wenseatuna tunkatapunapuchin wi'nina nuntunpi. Inake mamapayaru'santa pi'shitapunapuchin wa'winpita, aminpita nuntupi. Inake wenseatuna pi'iru'te ne'pepirinawe, a'ninkechin shihku ira wi'shataarin kenanpi.

Ina ni'pachinara napupi: Ni'kuchi kanpitanta shihku ira a'ninkechin wi'shataarin ya'nurin, inami nani yunatahshi nihsapasu yaraniri, shihkuri inapitari pa'tarin tuhpi mahshukuru'sa sha'wituna'. Inachi nihka imiranpukeran tahsatuwatera, a'na taweri chiminpatera kanpunta chimirin ira pa'tere'. Nahpuatun ku tahsaterewe', tuhpi sha'wituna'.

Nahpuatun yunutahshi nihpachina suhpairu'sa, muhtute, chanchun inapita iraterantapi, nahpuru urapuchin yarani shihkure nitu'shitesapi. Insusuna kanawachina ina chimirin ira wa'yanen a'patapi, tuhpi sha'wituna.

Inaran taantapi: Shihku ira a'ninkechin pentuninsu ya'nupachina, a'yapi wentakasu ya'karitarin, tuhpi. Inachina nihka a'yapisu we'shintaatun a'naruachin kankintarin. Nahpuatun ina ni'patera ku narintate tewarewe'.

We'empuke shihku wa'nawatera chinihken piyapi taranamare'. Ya'were yarani wa'napatan, inasu nihpirinwe wa'yanenparinken panituna mihshasapi. Inapuchin wa'nawatan a'naruachin wenseintasawatun pake amake', inaran ihsa mahsawatun shihku wa'yanen perahtatun ihsateke'. Tuhpi mahshuru'sa shiina sha'witatuna.







## Atari wa'ante perarinsu'


**T**aweri ya'kari nihsapasu a'kayanpuchin atari perahpachina ura sha'witun napuarin. Ina tataru'sa nahtapachinara wenseintasawatuna sa'ina uhchinanpi, wenseatuna ninuntakaisumare'. Nahpuru anuwa nimapirinawe nani anuwanta wehsukatarin. Nani taweri wi'tuntapasu atarinta kuhpi tuhsawatun wa'kihkeran wa'kihkeran perarinwachi.

Nani nuya tawerituwachina kuwachi perahpiwe. Pi'i kamutechin nihpachina nahpuruware peraantapi. Ina nahtanpatera nani kamutearin tene'. A'na taweri chinihken u'nanchinaachin taweririn. U'nanchinaachin i'waantaran.

Nahpuwachina ku pi'i ni'terinwe ni'tun ninuntuwatera ¿Unpuru pi'ita nihsaka? Tene'. Inapuchin i'wasapirinwe, atari perahpachina, ina nahtansawate tene': Inani atari perahsarinwachi, kuwachi u'nanapunwe nimara, tene'. Wa'kimiachin nihsapasu u'nan yamiraitumasawatun me'tarinwachi. Nani u'nan na'wepachina pehsuasawatun pi'i ni'terinwachi. Nahpuatun, manuyacha ataristu ninuterinpaya tene'.

A'na taweri nani i'waraya nihsapasu nara se'pake nanpesawatun wa'ante perarin. I'warayasu perahpachina nayuwarin tuhpi mahshuru'sa. Wa'ante nayuwatun i'waraya perahpachina sanapi keyurun kihpariterin, a'na taweri kemapi keyurunin. Nahpuatun ku nuyawe atari i'waraya perakasu'.

A'na taweri atari sanapiya nihpunawe nayuwapachina wa'antepuchin perarin. Nahpuwachina, a'naruahchin mahsawate tehpare'. Ama kanpu nayuwatiinpumarewe'.





## Shuhkuru peraantuwachinpura

**T**ahshi nihpachina nihsha nihsha shuhkuru pihpirin. Shuhshurusu nihpirinwe sehkerepuchin, nihpunawe kenanpatera a'naruahchin ta'arin. Kanpu chiminakasu nihpachina, kunihpu kemupinenpu chiminakasu nihpachina, we'ereke muhtunanke ya'karitawatun peraanterinpu'. We'erekeran nahtanpatera, tuntunpuchin irinsarin nahtane'. Ina nahtanate a'naruahchin kahpayatawate nahtanpirewe, shuhkuru ya'karisawatenu peratun napuarin nahtane'.

Nahpuru a'naruahchin wensesawate tehpare'.  
Ya'were ku tehpawaterawe, ta'asawatun tewarinpu'.  
A'na taweri ma'sha unpuate chimine'.

Nahpuatun, we'eranke shuhkuru peraantuwachinken, ama tuhpinan nahtaankesuwe, wenseatun a'naruachin tehpike'. Inapuchachin nanse ihsenpita, we'eresu piyurayan perahpachina nayuwatatenpu naputerinpu'. Peraantuwachinken a'naruahchin wensesawatun tehpike', inaran nuhka pahsharitawatun inake ihsenpi kayunteke'. Inaputawatun te'yateke', tuhpi mahshuru'sa sha'wituna'.



## Wa'nateresupita ayunkirinpusu nitutakasumare'

**A**'na taweri we'enpuke amasare wa'nare'. Ne'weike nihpun, pamaike nihpun amasaresu wa'nawatera nanitere kañukasu. Kemupiparinken amasapirinwe panka pamatawatun pamari imuturinsu wa'nawatan, ina piyapi kañusawatun chiminsarin.


Nahpuatun, tatamahshuru'sasu napupi: Pamahke, ne'weike amasransu wa'naatan, a'naruahchin wenseintasawatun pake uria munu mahsawatun a'peke', ina kunainen tumuntapasu inake nipehpateke'. Ama kañute chiminakasumarewe'. Ya'were, nuyahpi iike amasaresu wa'nawatera, inasu nihpirinwe nuyhya nihkate ya'wekasumare, ku kañurewe'.

A'na taweri chinii kepasarinpu wa'nare, inasu nihpirinwe chinihken nanan ku nuyawe nininsu nahtantakasumare'. Inapuchin wa'nawatan, wenseintasawatun na'pi sha'witeke', inaran inairaru'sa yuhkaru'sa nihpisupita inapita sha'witeke'. Inaputuwatan, chinihken nanan nahtantupiranwenta ku mihshasarinenwe'.

Inran, tatamashuru'sa nitutunu'sa nihpisupita sha'wituna napupi, we'enke iratapunawe uwei/uwi kenanpatan inasu nihpirinwe chinihken nanan ku nuyawe nininsu nahtantaran.

We'enke iratapunawe ku kenanatunwe uwei/uwi ya'kunteran ni'tun imurayatuwachinken, inasu nihpirinwe chinihken nanan mahsارينken, ku chinituwatanwe naniteran tahshinan peike kepainensu'. Ya'were, we'enke uwei/uwi kenanatun tehpatan, kemari mihshasaran.







Mamapayaru'santa tuhpi, sanapi we'enke uwei/uwi peisarin kenanpachin, ina sanapi shiyarapasu sanapia'wa wa'wansarin. Nahpuatun, wa'wini uwei/uwi wa'narinsu sha'wituwachina napaurin: ayun, sanapia'wa kemasu wa'wansaran, iterin. Inaran taantapi, we'enpuke ihchu wa'napatera, wa'kimiachin tawerimiachin nihsapasu peinenpuke iwate ya'kunatun iwarinpu'. Nahpuatun ihchu wa'nawatan ama pei patekesuwe'. A'nahken napupi: Ihchu wa'nawatera yunkiresuchachin ku ma'sha ninewe'. Ya'were kemari ihchu irahpake inansaran wa'nawatan, ku iwatenta peinenke ya'kunsarinwe. Sanapi kayurun nihpunawe tananke ihchu kenanpachin, ihchuri pinesarin. Kemapia'wa waipachin, ihchuchahchin nimintu taaransarin.

Nahpuatun sanapiru'sa ihchu kenanpachinara ku tewapiwe. Ama ihchuri pinekasumarewe'. Ina nihsawatun, ihchu tewawatera nahpuru i'waraya chinihken iwan pa'nin. Inasu nihipirinwe iwani a'piterin. Inaran taantapi, we'enpuke shihpi pe'nanate mahsaresu wa'nawatera, inasu nihipirinwe ihchu tawerimiahchin kusharu ya'wetarinpu. Ya'were, shihpi chanate yuntunsaran wa'nawatan ihchu tawerimiahchin tanarutaran.

Nahpuatun, tataru'sasu shihpi chanate yuntunsarin wa'nawachina, wenseintasawatun sain nuntatun napurin: Inamini kasu shihpi chanate yuntunsarawe wa'narawe, ¿tanarutari kanpusu nimarati? Pa'a paya chinihken kankantate sha'ta'a, tanarutuwate', tenin sa'in nuntatun. Ninaputatuna iminatuna sha'tupi.





A'na taweri we'ehpatera shihpi nunun pe'pesawate u'masare wa'nare'. Inapuchin kemapinpu wa'nawatera, a'kayan wenseintasawate wenu u'usawate ku insuteranta sha'witarirawe tanan pa'tere'. Nahpuru taweri kiran nihpun, yu nihpun tehpare'. Pawara ya'werinke nihpachina pawara tehpare'. Nahpuatun, inapuchin wa'natuwachinara nuya kankantatuna tananke pa'pi. A'na taweri wapituwatera shihpi munu uwarasare wa'nare'. Inapuchin wa'natuwatan ama intuwatera pakesuwe, nihsawatun a'naruahchin wensesawatun piyapi sha'witeke'.



Inasu nihpirinwe yarani imaiinpusumare'. Inaran taantapi, a'na taweri sha'we wa'nare'. Sha'we wa'nawatera sa'aware, tuhpi nitutunu'sa sha'wituna'. We'enpuke tanan pa'tapirewe nuhtuwaru sha'we nunkarusarin nahtansare wa'nare'. Inasu nihpirinwe inshateranta chiminpachin, na'neru'sa na'netuna nunkarupisu nahtanakasu, inamare inapuchin wa'nare'. Ya'were a'naihchin sha'we inapake wenseatun na'nesahrin nahtansaransu wa'nawatan, inasu nihpirinwe tatanenpu, mamenenpu nihpun chiminpachin na'nekasu'.



A'na taweri sanapi wa'narin sha'we wa'wihshin akushatarinsu wa'nawachin, inasu nihpirinwe payumiahchin sanapi wa'wanpachin wa'win akushatakasu'. Nahpuatun, a'na taweri sanapi inapuchin wa'nawachina tenin: Ayun, wa'wanapu kahsu nimara, tenin. Inapuchachin shu'wi wa'nawachin, payumiahchin sanapi kayusarin. A'na taweri kemapinta shu'wi wa'narin. Ina kemapi wi'napi nihpachin, payumiahchin sa'asarin. Ya'were nani sa'in ya'wetuwachin, payumiahchin sa'in kayusarin. Inaran nitutapi sanapi kayukasu nihpachina.

Inaran taantapi, a'na taweri we'ehpatera munchi perarinsu nahtansare wa'nare'. Inapuchin wa'nawatera chimipi nukuatuna na'nepisu nahtanakamasumare'. Ya'were munchi pinisare wa'nawatera, kemupinenpu chiminpachin na'nekasumare'. Nahpuatun a'na taweri inapuchin wa'nawatera wenseintasawate pa'ne mayu shinpan, ana shinpan inawita nukusawate sha'witere'. A'nahken Yuse imahpatera, wenseintasawate Yuse sha'witere. Nahpuru ku ma'sha unpurewe.



Peike munchi ya'kuintawachin, ihisu tawerimiahchin insuteranta kañusawatun chiminsarin. Nahpuatun mahshuru'sasu napupi: munchi peike ya'kuintawachina, kanpu wa'yanenpu inasu nahpuarin. Nahpuatun ku naniterewe tehpakasu', tuhpi mahshuru'sa.

A'na taweri a'ninkechin ya'weresu piyurayan munchi peratun nunkarurin, inasu nihpirinwe payumiahchin inshateranta chiminpachin pei patuwate sehtupiru nihsahpamare'.



A'na kemapi wi'napitapun munchi wa'nawachin, payumiahchin sanapi nuyahpirunyachin kenanpachin sa'ahsarin. Munhisu nihpiirinwe yuhka, nahpuatun yuhkatuwachinara munchi, nepe, yunkurun, uwe inawita yunkirawitupi. Nahpuru sanapi nu'witeraya nihpiriunta a'naruahchin anuwantumapi.





Inaran taantapi, nitutuna'piru'sasu napupi: Ishi tananke paatun nunkarurasarin nahtansaransu wa'nawatan, inasu nihpirinwe auhka aipitarin, tuhpi sha'wituna'. Nahpuatun a'na taweri ishi wa'nawachinara pi'tatekeran shunki nihsawatuna auhka ninapi, u'mawachin niawekaisumare'.

Ya'were inauraihchin wenseatun piyapi kenanatun wa'yantapachin, inasu nihpirinwe payu iwate peikenenke ya'kunsawatun ma'sha iwasarinken. Ishi wa'nawatan ama peinen patekesuwe. Sanapi ishi akushatarin wa'nawachin, inasu nihpirinwe payumiahchin wa'wanakasumare'. Kemapia'wa wa'wanpachin, ina kemapia'wa niminturawa nihkapun. Nahpuatun ishi wa'narin nihsapasu'. Napupi nitutunu'sa sha'wituna, ihpurawanta napupi.

Inaran taantapi, yu'win perahsarin nahtansaresu wa'nawatera, kemupinenpu ma'sha unpukasumare'. Ya'were yu'win perahsarin ni'tun nahtansawatun kemari a'panisaransu wa'nawatan, inasu nihpirinwe kemupimiahchin chiminpachin na'nekamasu'. Nahpuatun panka sehtakamasu we'enke sha'witatnenken.

A'na sanapi nanun we'enke nara se'pake yu'win wenseahrin kenanpachin, inasu nihpirinwe payumiachin a'na kemapiri ya'nutarin nuntakasumare'. Ina sanapi wa'nawachina nani taweri yunkiatun iraterin. A'na taweri iminke pa'pachina ina yunkiatun nuyarinsha ayaarin.



## Tame wa'nawatera

**T**ame yanpunsarin wa'nawatera, inasu nhpirinwe ku nuyawe, payumiahchin sa'aware'. Ya'were we'enpuke tame chanaru ka'sarin wa'nawatera, inasu nihpirinwe chimipi nukuaran. Nahpuatun ku nuyawe tame wa'nakasu'.

A'ninkechin tame kenanpatan, ama ni'miatekewe. Tame ni'miatuwatera, a'nanaya nuhtesawatenpu naweanterinpu, inaputuwachinpura kanpunta chimine'. Nahpuatun tame kushatawachina ku ni'newe'.

Nitutunu'sa napupi: Ya'weresu piyurayan tame yanpunatun tawihsapachin, inasu nihpirinwe sah'wisarin payumiahchin ina peike insuteranta ma'sha unpuatun chiminsarin. Ina sha'witun tame nahpuarin, tuhpi sha'wituna'. A'na taweri tame nayuwapachina pei ya'kariya nara aipike wensesawatun perarin, ina nahtanpachinara tataru'sa, mamaru'sa tuhpi: Ni'ke tame peraantarinpua, inkenpuata kanpuasu ma'sha unpuariwa, tuhpi. Ina tata nahtansawatun irahpa mahsawatun pa'nin tame inanapun.

Tame inansawatun weshintawachina, ina chanaterinke mukasawatun nuhtuwaru ahta, saki, inaran nihsha nihsha mahpin ka'piru'sa pahputerin. Wa'winan tame u'yutuwachina, a'naruachin chiminin. Nahpuatun sanapi kayurun nihpachina ku tame ne'perinwe, ama wa'win tame u'yutatun chiminakasumarewe'. Tamesu nihpirinwe inahpa yanpunatun nanperin. Inahkeran chanaru imeatun pa'pi chinihken tiruyapuchin inapakeran u'marin.





## We'enpuke anashi kenanpatera

**M**a'sha unpukasu nihpachina, ya'wereke anashi ya'kuitarin kenane'. A'na taweri anashi peike ya'kuintasawatun inake shunahsachin kewensahrin kenane'. Inapuwachina ku tehparirawe nara tanparake i'tatawate aipiranke uhkuire'. Tehpawatera kemupinenpumiahchin chiminin. Ya'were ku tehpawaterawe wa'kihkeran ahke kemupi chiminin.

A'na taweri tanan pa'tareke nayuwatuwachinpura ku'saterin nahtane'. Anashi ku'saantuwachinpura ku nuyawe. Inasu kemupinenpu ku nihpun kanpuchachin ma'sha unpuate chimine'.

Nahpuinchachin a'nataweri u'nahpi taweri nihpachina ira nuhtuwaru chihpiruterin, ina anashi pa'tatun winamen uwararin kenane'. Inanta nihpirinwe, keyurun ninutun nahpurin.

A'na taweri sanapi iminke paakeya anashiri wa'winpita pe'pesawatun ya'nuterin. Inaputuwachina, sanapirisu amirutatun yanpirin. Nahpuatun a'nahken sanapi anashiri pinewachina nuhtuwaru wa'winpita ya'weterin, tuhpi nitutunu'sa sha'wituna'.

Inaran taantapi, sanapi ya'wan aweatun tehsarin wa'nawachin, inasu nihpirinwe su'in chiminakasumare'. Ya'were tuhpinan ya'wani pentunterin wa'nawachin, inasu nihpirinwe kayukasumare'. A'nahken sanapi ya'wan wa'nawachina, tenin: inamini kasu ya'wan wa'narawe, ðsu'yawe a'na sanapi nuntahmare? Tenin. Inapuchachin, a'nahken kemapi ya'wan wa'nawachina yunkiatun tenin, ima'chanikhaya! ðMa'ta ya'werin ni'tun ya'wan wa'narawe?, tenin kemapinta.



Shiwara ya'wan inaran tayuwan inapita wa'nawatera payumiahchin inimiku kenansare'. Nahpuatun a'nahken ina yunkiatuna iratupi. Ama inimikuneni kenanatun awekasumarewe'.

A'na taweri irake paasekeya mañaru ya'wan pentuntuwachinpura, i'waraya nihsapasu chinihken u'natere'. A'nataweri chinihken iwan maninpu. Kunihpachina nanitere ma'sha unpukasu'. Naniterre anutate ya'panakasu. Nahpuatun a'nahken tatan pa'tapirinwe mañaru kenanpachina, inakeranchachin taweresawatun peinenke u'mantarin, ama ma'sha unpukasumarewe'.

Sanapi kayurun nihpunawe iminke nihpun, tananke nihpun pa'sapachina, naniterin ya'wani ya'nutatun a'payanakasu'. Nahpuatun sanapi kayurun nihpachina nani panka amuyu'nanpachina kuwachi intuwateranta pa'ninwe'.



## Anashi anawaru akurinsu'

**T**atamahshuru'sa irahkakeraware sha'wituna napupi. Tahshi ma'sha ka'nan ninate nararayake wenseaseke anashi we'pachin, nahpuru ku ma'shateranta tehpaaranwe.



Nahpuatun, mahshuru'sasu tuhpi: Anashi wekapaiwachinken ama ahketeware ninatekesuwe, a'naruahchin pateke', ku nihpun peike weshimake'. Anashi wekapaipirinkenwe ina awantawatun ninatuwatan, tuhpinkeran we'ii nahtansaran.

Nahpuatun ku nuyawe anashi ya'nutiinpusu. Anashisu nihpirinwe, pinenke senkupi ya'weterin, ina senkupinen nuhtuwaru anawanin; nahpuatun ina ka'nanu'santa imewachina ku naniterin aipitakasu'. Anashi wa'sanawaninsu imesawatun ahke iratupi. Anishisu niohpirinwe kashinu'sarahchin ka'pirinwe anawanin ni'tun amirutupi. Nahpuatun ku nuwantupiwe a'nawitarisu kapakaisu'.

A'nahken piyapi ya'werin anashi tehpaatuna ka'pi. Tumahken matupi, wa'waru'sa iruri ya'kuntuwachina, anashi tuma mahsawatuna inake ya'ipi kahkupi inaran pi'pian u'shitupi. Inake ahpira ahpira u'shitawachinara a'naruahchin iruri pahsaterin. Nahpuatun anashi kenanpachinara tehpaatuna tumahken matupi.

Irahkachachinsu ku ahkete anashi ka'piwe, ihpurasu kahpa ka'nanu'sa ya'werinwe ni'tun, anashi teh pawachinara shuru tehparawe tuhsapi. Yamuraike inaran wankurake ya'wepisupita pa'pi pa'yatupi. Anashi chinpitupisu wa'washa a'kawachinara ku sanpaterinwe, anutupirinwe kumanta ya'paninwe. Tu'tatupike a'napitari tu'tapirinawe ku ihkiterinwe. Nahpuatun a'nahken mamaru'sa anashi wa'wina a'kapi.





## Wene wa'nawatera

**K**anpuwasu ya'werewake nuhtuwaru ya'weterinpuwa, tawerinen nihpachina mahkate kane'. Nihpunawe a'nataweri na'kun na'kun ka'patera yakashihtere'. Nahpuatun ku nuyawe ka'kun kapakasu'. Inapuchin nihpirinwe a'nataweri ku nuyawe wa'nakasu'. We'empuke unputare wa'nawatera, payumiahchin peinenpu pihpinanpikasumare'.

Nahpuatun a'na taweri unputapi wa'nawachinara napupi: ¿Unpuanta kahu unputarawe wa'narawe? ¿Ma'cha unpuwatewa pihpikasumare inapuchin wa'narawe nichka? Tuhpi nitutunu'sa. A'na taweri ma'sha unpuate nichimiantuwatera pihpikasumare inapuchin wa'nare'.

Inapuchin wa'nawatan, wenseintasawatun pake yanu yuntunsawatun, kepaatun wene'puru tu'chianke, nuhtuwaru yamuintawachin yanu uwananteke'. Uwanantapuunchin naputeke: manuhtun pihpika, pake a'na parihchi, manuhtun pihpika. Napututun yanu uwanantuwatan, payumiahchin wene nu'wasarin.

We'enke wene iranen pa'tarin wa'nawatan, inasu nihspirinwe na'kun sahatu ya'wetarinken. Ku chinihken sahatuwatanwe, ku nanitapunwe sahatu tihkikamasu'. Pahkaturu, imiana inawita pantatarin.

Nahpuatun, inapuchin wa'nawatan, manutawatun kemupinenpita sha'witeke inawita kahtapainken manuhtun sahatu thkike'.

Nahpuatun ya'ipi piyapiru'sa napupi, ku nuyawe wene wa'nakasu tuhpi mahshuru'sa, mamaparu'sa shiinpita sha'wituwachinara.







## Ta'mu wa'nawatera

**T**atamahshuru'sasu napupi, we'enpuke tamu pa'yatare wa'nawatera, ana taweri sehtakasu'. Sanapi we'enke a'naihchin ta'mu yanpunatun pa'sarin wa'nawachin, su'in chiminakasumare'.

Ya'were kemapi inapuchin wa'nawachin sa'in chiminakasumere'. Nahpuatun a'nataweri ta'mu wa'napachinara sehtatuna na'nepi. Inapuwachina shiinmahshuneni iterin inapuchin wa'napatan a'naruahchin wenseintawatun na'pi, shinpa inapita shawiteke'. Inaputuwatan kumanta unpuaranwe, tuhpi mahshuru'sa.

Kahtu ta'mu yanpunatun pa'sapi wa'nawatera, inasu nihpirinwe kahtuenpuchachin ahke paakasumare'. A'nahken tatamahshuru'sa napupi, inapuchin wa'nawatera a'shinpu inaran tatanenpu ma'sha unpuatuna chiminakasumare inapuchin wa'nare', tuhpi sha'wituwachinpura. Napuatun, inapuchin wa'nawatan, wenseintasawatun pake shinpan sha'witeke'. Inaputuwatan mamaparinken, tataparinken ku ma'sha unpushapiwe'.

A'na taweri chinihken kañu mahpachinpu piyapiru'sa tahkikaisumare nuhtuwaru ta'mu peipite ya'kariya tawi tawirantarin wa'nare'. Inapuchin wa'napatera ku wa'kirinwe kañu mahterin. Nahpuwachina piyapiru'sa na'kun chiminpi. Inapuchin a'nahken wa'napachina a'naruahchin sha'wirin nimiru nihkatuna u'uhpi ama kañuri tihkikaisumarerwe'. A'nahken nitutunau'sa napupi: Nuhtuwaru ta'mu wentunen nu'teen na'wesapi wa'nawatan, inasu nihpirinwe payumiahchin naman wentarin, tuhpi mahshuru'sa sha'wituna'. Nihsawatun nani tahshiramiachin ta'mu wentunsawatuna pa'pachinara, ina ni'pachinara naman ya'kariterin wentakasu, tuhpi ta'mu ne'peatuna'.





Inaran taantapi tatamahshuru'sa, a'na taweri na'kun sahkatu ya'wepirinwe ku ahkete manutuwaterawe, kuwachi naniterewe inahpuchachin tihkikasu'. Nahpuwachina a'na taweri kusharu pawanterinpu'. Ihsu tawerimiahchin kusharu pawantiinpusu nihpachina we'ehpatera atari pi'paterin wa'nare'.

Atari pi'pairun kayuhken nitaran wa'nawatan, payumiahchin kañu mahsarincken. Ya'were, we'enpuke tuhpinan ahkeran pi'pairun nuhtewatera, inasu nihpirinwe tanarutakasumere'. Inapuchin wa'nawatan, chinihken sahkateke kusharu pawantuchiken, tuhpi mahshuru'sa nunatuna'.

Inaran taantapi: Ihpuraware wehshinkasarin wa'nawatan, inasu nihpirinwe na'kun kusharu pawantuwachinken wi'nanpita, wa'wanpita kusharuri pawantuwachina na'netuna nunkarusapi. Tuhpi mamapayaru'sa tataru'sa sha'wituna'.



Inaran taantapi, a'nataweri we'ehpatera nihsha nihsha wa'nare'.  
Kañukasu nihpachina, sanapi i'nanpirashite pa'sarin wa'nare'.  
Chinihken kañukasu nihpachina, kunihpun ya'wanakasu nihpachina,  
sanapi i'nanpira'shitesawatun wekapairinpu'. Nahpuatun  
mahshuru'sasu napupi: Ya'wanakasu nihpachina, sanapi nuya  
i'nanpirasawatun kewenaparinpu wa'nare'. Inapuchin wa'nawatan  
ama intuwatanta pakesuwe, tuhpi mahshuru'sa sha'wituna'.

Inran sha'wiantapi, inapuchin wa'nawatan pake uria  
chimi munu mahsawatun ina a'petun nipehpateke'.  
Inaputuwatan kuwachi ya'wanta ya'karisarinke'.

Kahtu sanapi i'nanpira'shitesachin wa'nawatan inasu nihpirinwe  
ihstu tawerimiachin iwateru'sa peinenparinken ya'kunatun ma'sha  
iwasarinken. Nahpautun mamapayaru'sasu napupi: Inapuchin  
wa'nawatan ama peikeparinken intuwatanta patekesuwe'.  
Intuwatanta yapa'patan, a'nateranta wa'washa pateke', inariteranta  
pei nihkake, tuhpi mamapayaru'sa sha'wituna'.

Sanapi we'enke i'nanpirashitesawatun pa'sarin  
wa'nawachin, inasu nihpirinwe pa'yan we'ehtarin,  
kemupinen nihpun, wa'win nihpun ma'sha unpuatun  
naniterin chiminakasu'. Inaran taantapi, we'enuke  
taya kenanpatera, inasu nihpirinwe chimipi  
nihkakasu. Inamare taya wa'nare'. Kemapi  
nihpu, sanapi nihpun taya tehpaatun  
nukusarin wa'nawachin, inasu  
nihpirinwe payumiahchin wi'nin,  
wa'win chiminpachin nukukasumare'.



Nahpuatun, a'na taweri inapuchin wa'napachinara, ahchinpuchin wensewachinara kankan yunkiatuna na'nepi. Su'ine, sa'ine ninuntuwachinara napupi: ělnsuta kanpusu wa'wanpu chiminakasu ni'tun inapuchin we'ehsahre'?, ta'tuna na'nepi.

Taya kenanan ni'tun te'watuchinachin nu'witarin wa'nawatan, inasu nihpirinwe ku yunkiasenkenwe wira chinihken awetarin. Inapuchin wa'nawatan, ni'kena wira awechinken tuhpi mashuru'sa'.

Taya anu'witeran ni'tin imahsarinken wa'nawatan, inasu nihpirinwe ihesu waterimiahchin inimiku ya'wetarinken. Nahpuatun tataru'sasu napupi, taya imahsarinken wa'nawatan a'paiatun irateke', inimiku tu'shiteatenken awechinken. Sanapi nani a'na kemapiri nuntuwachin, ama nuntakamasu yunkikewe, awechinen, tuhpi mahshuru'sa wi'nina penenatuna'.





## Mayu wa'nawatera

**T**atamashuru'su, mapayaru'sasu sha'wituna napupi, tanarutakasumare nihpachina we'enpuke mayu kenane wa'nare'. Mayu kema wa'nawatan, payumiahchin ma'sha pawantarinken, kusharu, kurihki, a'mukamasu inawita pawantarinken, tuhpi nitutunu'sa sha'wipachinara.



Mayu mahsaran wa'nawatan inasu nihpirinwe na'kun sehtakasumare, kemupinenpu chiminpachin na'kun na'nekasumare'. Nahpuatun ku nuyawe mayu mahsaresu wa'nakasu'. Nahpuatun a'na taweri insuteranta mayu mahsarin wa'napachina, sehtatun kankan yunkiatun na'nerin.

Mayusu nihpirinwe a'naruahchin yanunpinterinpu, nihsawatun a'naruahchin ananianteripu'. Nahpuatun wa'washa mayu kankan a'kawatera a'naruahchin ma'sha yananianterin. Wa'washa inapuchin nihpachina pinen pinen uhsharanmiachin awetere'. Inaputuwatera kuwachi wa'washanta ahkete ma'sha nanianterinwe'. Nihsawatun, mayusu nihpirinwe iwani, wirari, u'nani inawitari a'piterin. Nahpuatun mayu narintuwatera a'naruahchin u'nan tahshisawatun chinihken iwan pa'nin inaran wirarechachin u'nan anuterin.

Chinihkan wira awetawachina, mayupinante a'pesawate inake pehpatuwatera, a'naruahchin wira sanumasawatun kuhpi tunin. Nahpuatun, mamapayaru'sasu mayu ka'pachinara, pinanteen tahpapi. Inake wira pehpatakaisumare'. Inapupuchachin sanapia'waru'sa ihpuraware nenunapunaraiwe ku sha'wipachinaraiw, wira nenunpirin nu'witun chinihkan awetawachina, mayupinante mahsawatuna a'pewachinara, nahpuru wira kuhpi tumarin.







## Sanapi su'ine pa'sarinsu wa'nawatera


**A**'na taweri sanapi we'ehpachina su'ine iratatin wa'narin. Inapuchin wa'napachin, ihesu tawerimiahchin su'in ahke pa'sarin. Ahke su'ini patuwachin wa'kimiachin inaura ya'wesarin. Sanapi ihesu tawerimiachin keyurunakasu nihpachina, nanitashi we'erinke su'ini ahke paterin wa'narin. Inapuchin sanapi wa'nawachina su'in sha'witatun na'nerin. ¿Unpuatunta kasu ahke pateranku wa'narawe? Itatun su'in naneterin.


Amipaya wa'winpita nuntuwachina napurin: We'enpuke su'yanpu ahke peterinpu ni'tun kanpura ya'weate nahshinan mahkate irusaresu wa'nawatera, inasu nihpirinwe ihesu tawerimiahchin su'yanpu ayawachin na'nekasu, tuhpi mamapayaru'sa.

Nahpuinchachin, kemapinta we'enke sa'ine iraterarinkeran, sa'in patawatun a'na sanapi mahsarin wa'nawachin, ihesu tawerimiahchin ina kemapi chiminsarin. Nahpuatun wa'yani shaterin, tuhpi amipayaru'sa.


Kemapi wi'napi nihpachina, a'na taweri wa'narin sanapi nuwanterinsu nuntahrin. Inapuchin wa'nawachin, ku ina sanapi mahsarinwe. Kemapirisu nuwantupirinwe, sanapirisu ku nuwantarinwe. Nahpuatun we'enke inapuchin wa'narin. Sanapinta we'enke kemapiri pa'pi nuwanterin wa'nawachin, ku ina kemapichachin su'yatarinwe, kemapisu a'na sanapi mahsarin.

Sanapi nihpun, kemapi nihpun we'enke nahpuinsachin ku ninuwantupiwe wa'napachin, a'ninkechin ninuwantatuna nimahsapi.





# U'yapi mahsaresu wa'nawatera



U'yapi mahsaresu wa'nawatera, payumiahcin chinhken nanan nahpunin nininsu nahtantakasumare'. Sanapi u'yapi mahsarin wa'napachin, nanan nahtantarin.


Nahpuatun mamapayaru'sa wa'wini sha'wituwachina napurin: ěManananta kemasu nahtantamare u'yapi wa'nara?, ěinta kemasu nahpunin yunkirapiahrinken? Amana wa'wa nahpunin nihkatunwe nuyahsha ya'weke, iterin wa'win nuntatun.

Naputatun wa'win penenin ninutatun ya'wekasumare'. Nahpuatun a'nahken nanu'sa nuya ya'wepi. A'na taweri su'yawachinara nuya su'ine nikepapi.

U'yapi kayarantawachina, tanpawanu'santa tumaterantarin. lhchu, suru, tu'ya, tehkerinan, kuwasha, kuwi, ihsen, nu'un inawita tumaterantarin. Nahpuatun nahpuru taweriru'sake tananke pa'chachinara tanpawan mahpinu'sa tehpati. Ni'punawe, nahpuru tawerisu nihpirinwe wanpi aipitarin. Tanan pa'tuwachinara ku tanpawanu'sa mahpin yunkiatuna pa'piwe, ama suhpairi wa'yantakasumarewe'.

Nani u'yapi shitaterantawachina nahpuru u'nan chinihken anutarin. Iseranta nuhtuwaru na'asarin. Nahpuatun tataru'sasu isera na'ahpachina napupi: Nani u'yapi shitaterantarin ni'tun ihpura isera na'arin, tuhpi nunatuna'.





## Mahki, shinpa inapita irusaresu wa'nawatera

rahkakeraware mahshuru'sa, mamaparu'sa wa'natupisupita amina sha'witupi inawanta nitutakaisumare'. Nahpatuna ihpurawa sha'wipachinara napupi, a'na taweri we'ehpatera shinpa, mahki, tahkun, shinpira, kehpa, pawa, nahshinan inawita irusare wa'nare'. Inapuchin wa'nawatera, payu kemupinenpu chiminpachina na'nekasumare'. A'nahken inawita irusarin wa'nawachina, wenseintasawatun kankan yunkiatun na'nerin, ċinsuta kasu wi'nawe ma'sha unpuwachin ayatapu? Tenin.

Mahki irusare wa'nawatera, kusharu pawantinpusumare'. Shinpa, shinpira, nahshinan inawitasu na'nekasumare'. Kemapi pahpayu ka'sarin wa'nawachin, sanapi kenanatun nuntarin.

Na'kun mahki mahkatun ka'sarin wa'nawachin, inasau nihpirinwe kemupinen chiminpachin na'nekasumare'. Ya'were we'enke ahkeran mahki nuhtuwaru tanunpiarin wa'nawachin, inasu nihpirinwe a'napita chiminpachin chimipi nukakasumare'. Nahpuatun tuhpi ku nuyawe mahki wa'nakasu'.

Ya'were kemapi iminenke shinpa pahkarapiarin wa'napachin inasu nihpirinwe payumiachin sanapi mu'kurunsha kenansarin. Nahpuatun a'nahken shinpa wa'napachinara ku nuwantupiwe sha'wikaisu. Pahkarike ina yunkiinpichin ira pa'tahrin sanapi kenanepuchin kankantatun. Ya'were sanapi shinpa pahkarapiarin wa'napachin payumiachin kayusarin. Shinpa pa'yatatun mahkatun ihpusarin wa'napachin payumiahchin wa'win ihpusarin. Inamare inapuchin wa'nare tuhpi payaru'sa sha'wipachinara.





## Ninunentaresu wa'nawatera

**K**anpuwasu ya'werewake kañupatera ninunenatawa ya'werewa'. Nahpuatun a'na taweri wa'nare ninunensaresu'. Kañumiya mahpachinpura nunenamen nihsawate u'uhpatera a'naruahchin nuyatere'. Ihsuru'pake chinihken suhpai sahkaterin ni'tun penutunu'sa nahpunin yunkiwachinara yashuntatupi. Penutunkeran piyapi kañuwachina, wa'ki kañusarin, ku a'naruahchin nuyatarinwe.

A'na taweri kaña'pi kankan yunkirarinkeran we'ehpachina, pa'paya nuwantun we'erinke wa'yani shawiterin. Piyapipuchi nihsawatun wa'yani ya'nutatun nunenin. Pake tahshiramiachin na'keran shinpan mahsawatun tu'nake inaran akitawatun inake nitunputeke'. Yawe'ehpatan inakechachin nitunputawatun we'ehke, iterin.

Nahpuatun, kaña'pisu wenseitasawatun kemupinen sha'witerin inari shinpan matuwachin ninunenakasumare'. Nahpuatun inake ninunenin ni'tun, tahshisu nunensapi wa'narin. Nahpuatun kahpayatiintapirinwe insekechinsuna inkiterinsu nuya sanuhken nahtanin.

Na'kun piyapiru'sa wa'natatuna kañupikeran nuyatupi. Wa'natate ninunenpatera kuasu nunpinterinpuwe. Inamaresu a'naruahchin nuyatere'. Inapuchin a'nahkensu wa'natupisu yunkiwachinara wenseintasawatuna tananke paatuna nunenamen mahkatuna nimiriu nihkatuna kañupachinara u'uhpi nuyatakaisumare'.

We'enpuke nunensarinenpu wa'nawatera, nuya nuyatere'. Ya'were we'enpuke nuyatere wa'nawatera inasu nihpirinwe ku nuyaterewe', inapurarekeran chimine'.



Inaran taantapi, nahpunin nanan nahtantakasu nihpachina, a'na taweri chi'sare wa'nare'. Piyapi kemari ni'sapiranwe wensesawatun chi'chisarin wa'nawatan, ina piyapi pinuhsarinken. Ku inshateranta sha'witupirinkenwe kemasu nani nitutaran mapiyapisuna pinurinkensu'. Ya'were, we'enke kemasu piya ni'sapirinkenwe chi'chisaran wa'nawatan, mapiyapisuna kenan ina piyapi anunsarinken. Ku kemasu inapuchin nunpiranwe, ina piyapi anunsarinken.

Inaran taantapi, sanapi shu'wi akusarin wa'nawachin, inasu nihpirinwe payumiachin kayukasumare'. Kahtu shu'wi akusharin wa'nawachin, kahtupia'wa kayusarin. Nahpuatun a'nahken sanapi kahtu shu'wi akushatarin wa'nawachina, pa'yanatun tenin: ¿Ma'ta kasu unpuka'wasu ni'tun kahtu shu'wi akushatarawe wa'narawe? Tenin. Napuwachina, su'ini nihpun, a'shini nihpun naterin: iaria'! ni'kena kahtupia'wa wa'wantan, itupi.

Ya'were, we'enke shu'wi inapa wenseatun na'nesahrin wa'nawachin, inasu nihpirinwe sa'awakasumare inapuchin wa'nasarin. Sa'awapachin na'nekasumare'.








Inaran taantapi, we'enpuke inantare wa'nawatera, inasu nihpirinwe ahke paakasumare', a'na ninanuke paakasumare'. Yunkurun, chinsha, pa'para, inawita inasaran wa'nawatan, inasu nihpirinwe sanapi nanunmiahchin kenansaran.

A'na kemapi anpiantewanu'sa inanpirinwe, pahkuiterin ni'tun ta'arin wa'nawachin, inasu nihpirinwe sanapi nunterinsu a'na kemapiri mahsarin. A'na taweri we'enke anpiantewanu'sa inanpirinwe tuhpinan pahpanterin wa'nawachin, inasu nihpirinwe sanapi wa'wantapunawe ku mahsarinwe.





Iran taantarin, kañu mahkainpusu nihpachina, penaninke, ahkawake, nuñaruke pe'isare wa'nare'. Na'kun piyapi yamusawate pe'isaresu wa'nawatera, inasu nihpirinwe ninanuke ya'werewasu inahpuchachin kañu mahsarinpuwa'. U'wairu, sa'ka kañu inawita inasu wa'nare'.

Nuhtuwaru sami mahkate nukusaresu wa'nawatera, inasu nihpirinwe piyapi nuwiteresu chinihken kañuri manin ni'tun chiminpachin chimipi nukukasu'. Nahpuatun inapuchin wa'nare, tuhpi mashuru'sa.



Inaran taatarin we'ehke kawariu ya'mitetawatun pa'saran wa'nawatan, inasu nihpirinwe payumiahchin ma'sha yunkiransu ihkantaran. Inapuchin wa'natuwatera nanitere wa'anpuchin nihkaku'. Napuatun kawariuke pasapi wa'nawachinara nuya kankantupi'. A'chinpeike ya'kunsawatan, pi'i nitihkiakeware nuya kirika nitutatun nanpesaran.



Kawariuke pa'sapiranwe, chinihken keparinken ni'tun anutuwatan, inasu nihpirinwe a'chinpeikeran wankupikeran teh pantawatun pihpiaran. Piyapi ya'wanakasu nihpachina, insehkesu ina piyapi ya'werin, ina parichi kuhkuwite yanpunatun pei tawihtherin. Inapuchin ni'pachinara tatamahshuru'sasu tuhpi: Ni'kechi kuhkuwite pei tawihtherin, paku manuhtun i'tepi mahsawatuma a'petuku kunai imeatun ya'wan ta'ain, ya'wanakasu ninutun kuhkuwite nahpuarin, tuhpi mahshuru'sa kuhkuwite ni'pachinara. Nahpuwachina, ananan munu, nuhkate, penanin munu, i'tepi inawita mahsawate a'petate inake pehpatere'. Nahputuwatera ya'wan ahke ta'arin.





## Tayurarun ma'sha a'chinsapirinwe'

rahka mamapaya Irihseriyaku sha'wituwachinkura napurin:  
“A'na anashi piyapi nihpun ku sa'atunwe, ihshinpi mahshu  
ninin. Inapuchin ya'werahpirinwe, tayura nuntatun wa'narinsu  
pihkeran tanan pa'tupirinwe a'na tanan wankana tanpuke sanapi  
i'narinsu, nanpiruwa i'chatupisu kenanatun ninapirinwe'.

Naniwachi pi'i wankurinte nihsapasu a'na sha'we  
yanpunimasarinkeran nanpiruwa se'pake wenseimarin. Inaran  
a'nanta yanpunimantarinkeran a'na sha'we piyurayan wenseimarin.  
Inakeran kahtu sha'weru'sa nu'paruke nuwaraimapi.

Nuwaraisapatuna nanu'sa nuyarunsha taranpi. Inaran ninuntatuna  
napurapi: —“*Pa'a kaira nuwa ma'te nuwata'a*”, niitapi. Nahpuruwachi  
anashi wina'pirisu ta'arasawatun ainen materin. Nihsha nihsha  
taranpirinwe ku a'purinwe, ni'tun wa'ki nihpachina sanapi  
tarantawachina ninuntatuna nimahpi. Inaran ma'sha ni'tuna  
ya'wekaisu, wa'washa ya'wekaisu yunkipi. Inaran anashi wi'napiri  
peinenke yakemapirinwe tayura sanapi nanunsu ku nuwanterinwe'.  
“*tahpuna ku mamaparin nuwantupirinwe, pake' pa'matun mama  
nahtanke nuya nuwantuwachinku kanta pa'mai*”, iterin.

Tayura sanapi nanuni naputuwachina, anashi kemapisu  
nihpirinwe, peike umarawatun a'shin shawiterin: —“Inamini  
mama kahsu tananke nuwa nuhtuwaru sha'weri a'kirin ni'tun  
ina ninahpirawe kahtu sha'we nuwarasawatuna sanapi  
taranpi ni'tun a'na sanapi nanun ma'tu sa'ahterawe.



Kema nuwantuwatan peike kemai. Inayateranta kanta ka'tainku ya'weatu nuhkuma'inken”, iterin. Ya'were, tayura sanapisu pei intunkeran na'pitun nahtanahrin ina wi'napi anashi payare ninuntupisu'.

Naniwachi anashi wi'napi a'shine ninunterinsu nitihkituwachina. Anahshi kemapisu tayura sanapirun peike kepamawachina. Anashipayari nuyahsha nuntatun napterin: “Nuya inapuran wa'wa, u'make wa'wawe su'yateke kahpa kahpa kankankeran ichiya'wesarinken”, iterin.

Anashipayari naputuwachina su'ine tayurarunsu ninuntatuna peikaisu, iminakaisu yunkiatuna a'na une, a'na wika, inapita mahpi. Inaran nu'pa kunitupi. Inapusawapirinawe nani i'wapachina a'shin peinenke u'mapi. Inake kankimasawatuna anashipaya wa'wini sha'witerin iminakaisu, peikaisu sa'ine yunkirinsu. Nani tahshiwachina we'ehpiwachi.

Taweririnke ni'pirinawe a'na panka pei nahshamichain wanirarin. l'warapuchin pei nihkakaisu yunkiatuna karaihchin nara mahpirinawe, tahshisu panka pei nani taranin. Inapuchachin imin nihkakaisumare nu'pa kinitatuna pi'pian iminatupirinawe, taweririnke nani panka imin niantarin. Ina tayuraru ma'sha nihkakasu yunkiyasapirinwe nani ma'sha nininsu a'naruahchin tihkirin. Inapuchin irahka anashi kemapiri tayurarun sanapi manin ni'tun ma'sha nihkakaisu a'chinsapiririnwe. Yayurarun sanapi ma'sha ku sahkaikeran nihkakasu a'chinsapiririnwe, a'shateni teweterin ni'tun pa'pin ya'werinke pantarin.





## Anahshi kemapi mi'sene niawepisu'

rahka anashi sa'ini inapake patuntarin. Inasu sehtahrin ni'tun suhpuri nunpinterin. Inaran wihshuri sa'in ya'werinke kepantarin ni'tun sa'ini pa'pin ihshiike pe'iapun pa'ninsu peinenke kepamarawatun a'shin iterin: “Mama mi'separin we'nin”, ituwachina a'shinsu tenin: “Ayuun..tatarimini wi'sesu ka'sarin”, tenin. Wi'ninpitanta nunterin ni'tun nuya kankantupi.

Napusawatun wa'win kamairin: Pake ahpiramiachin tata nu'witu shinpipinen mahsawatun. Ina wenurawatun uhpurutawatun u'shiteke'. Nahpurawatun a'na tata shunkinen mahsawatun inanta keteke', iterin. A'shini naputuwachina inapuchin nitawatun, penenin: “tata i'sha inpiitarinke pihtapachinken, tawanke pihtapachinke ama sanpatekesuwe'. Nani tata shinpipinenke nunenanken, tata shunkinen keteranke” itawatun panka we'ehtake uhkuweterin.

Nani i'warasawasu wiramashusu ihshii parihchike “tahkarin, tahkarin”, terintasarin. Naniwachi kankitasawatun peike ya'kunawatun ime imeterantarin “tahkarin, tahkarin”, tuhsarin mi'sen imeatun. Ma'ta kahu shinpa shinpa imesarawe. Ahpiramiachin shunkike shinpa pahshutatu shinpa ka'sarawe, tuhsari.

Nahpusawachina wi'nini iterin: —“Mi'separin kankintarin”, itawatun we'ehta i'suwaterin. Sa'ini i'suatuwachina ku sanpayawe anashisu ihtua pahshi, tenin. Ina wirasu ni'sawatun mi'sen pahshita'parin i'sha inpiitarinke pihtapirinwe, anashisu we'ehta ahketeware pahshi tenin. Inaran pen tenentawake pihtapirinwe,





anashiisu pen ahketeware pahshi taantarin. Nani kararu inaputerinke yachi'chirawe mi'se', iterin ni'tun pake', iterin.


Tananke chichiwachina chi'chinpira we'pi. Inake a'na yara chinpira, a'na kewan chinpira keshintarin. Ina chinpiraru'sa ka'sawatun napurin: Inantun mi'sea'wa. Nahpuatun pawara, yu inapita inanin ka'parawe tenin. Napurawatun pa'a mi'sea'wa tanpuke itawatun inake kepaantarin.



Inake kankunsawatun wiramashusu a'na shunki unkuwiñankeran nininsu a'naterahpu pahsapuchin ke'ninsu ahkeranchachin te'yananterin. Ina anashisu pankamirin. Nahpuru anashisu wihshuri penui a'chinterinsu, sa'ini nu'witu shinpi u'shiterinsu inapita yunkimasawatun, “ihpura mi'se nuwitarinku” tenin.

Nahpuruwachi mi'sene ina shunkike wenintapirinwe. Anashinta shunki se'kerinkeran “ihtua pahshi, ihtua pahshi”, tuhsarin. Ku mi'sensu manta unputerinwe'. Nihpunawe kahtu shunkiru'sachachin “ihtua wenapu, ihtua wenapu”, tuhsarin. Wirari pu'pin wenintupirinwe mi'sen ku yakaririnwe ni'tun napuri.

Ihpurachasu mi'sea'wa itaranken. Kapuchin kemanta chiniransu ya'weterinke. Nahpuatun ihpurasu sa'ane'ken nuya ya'weatun wi'nanpita nuhkumake', iterin. Inapuchin irahka anashi piyapi nihpun wira wi'nin ma'tun inapuchin nininsu nishitatu sha'witarankema kanpitanta nitutuku'.



## A'na ninanua'wa ahkupuru pa'marinsu'

'wamiachin Kihssusu Kuruse Taike ya'werinsu nuntatunku sha'witerinkusu kanta sha'wichinkema kanpitanta ihpura ku nitutechateramasuwe nuntatuma nitutatuma a'napitanta sha'wituku nitutatuna ya'we'ina. Inapuchin nituterewasu nisha'witatewa mahshukuru'sa sha'wipisu ama ayatunpuchin niinsuwe.

Ina ihpura nishirarawe: Irahkachi nihka a'na panka Shawi ninanu Taike ya'wepirinwe'. Inasu nihpirinwe Mahchiku itupi, panka ninanuru'sare nahpuinachinpuchin kañariterinsu ya'wepirinwe'. Inake wa'ki ya'weatuna na'kun piyapiru'sa ahketechachin na'arasapirinawe. A'nanayapuchin kañu a'na nu'pakeran kehpi ni'tun nihsha nihsha iiru'sake shawiru'sa ya'wepisu tahkirantapi nahtantupi.

Ina nahtantatuna sehtupí. “Ina kanpuwasu kañu kantiwachinpuwa wi'nanpuwa, sa'anpuwa, kanpuwachachin chiminpatewa tahkiariwa” tuhpi. Napuatuna nani taweri ninuntatuna sehtahpi. “Intuwacha kanpuwasu paatewa kañu patere paya”, ta'tuna sehturechachin ya'werahpi.

Inakeranwachi niyuntunatuna ninuntatuna ninaputupi: “lyaru'sa, ma'cha kanpuwasu chinihken kañu ya'karirinuwa. Ina kañuhsu Muru itupi. Inasu ya'kuntuwachinpuwa, ya'ihpi kanpuwasu tahkirarewa. Ina kañusu nihpirinwe, ku a'nayateranteranta nicha'erinpuwe. Intuwanta ta'apirewe, inahtuwa wa'yanenkeran imatenpu akañurinpu”, niitupi.



Inapuchin ninuntatuna we'epirinawe, a'na kemapisu we'enke a'na piyapiri naputerin: “Ama iyaru'sa sehtukusuwe, se'nu mahsawatuma a'na sh'wira'wa u'shitawatuma, pa'chira'wake uhkuutuku'. Taweririnke nahtanarama, ahkupuru pa'matun inake nunsahpun. Inaran kanpitanta, ina u'uhpatama, ahkupuru pa'mararama”, iterin.

Taweririnke, niyuntunawatuna nisha'witupi: Inamini iyaru'sa kahsu, we'eweke a'na piyapi naputerinku: “Ama iyaru'sa sehtukusuwe, se'nu mahsawatuma a'na sh'wira'wa u'shitawatuma, pa'chira'wake uhkuutuku'. Taweririnke nahtanarama, ahkupuru pa'matun inake nunsahpun. Inaran kanpitanta, ina u'uhpatama, ahkupuru pa'mararama”, iterin.

Ina nahtanawatuna, tuhpi: “Pa'awa nuhpachi iyaru'sa inapuchin a'na shu'wira'wa nitawa. Ina we'ehke wa'naransuchachin nihpachin, kanpuwanta inapuchin nihkatewa, kañu ta'ananpiawa”, tuhpi ninuntatuna'. Napurawatuna, a'na shu'wira'wa se'nu u'shitawatuna pa'chira'wake uhkuwetupi. Taweririnke pa'chira'wa unatepirinawe, i'sharahchin anpuirahrin. Nahpuwachina peratuna, “shu'wi, shuwi”, itupirinawe. Ina i'sha anpuirinsu ahkupui, a'paniterin: “kiri kiri, kiri kiri”, tuhsahrin ahkupui'.

Nahpuwachina, yaihipi niyuntunawatuna ninuntupi: Ni'kechi shu'wira'wasu se'nu u'shiterewa ahkupui pa'marin. Nahpuakeware kanpuanta ina u'uhpatewa, ahkupui pa'mararewa'.

Pa'awa, na'kun se'nu pahsatawatewa, ya'ihpi iminenpua, peinenpua, iraru'sa tananenke pa'newasu ta'satawa'. Inakeran kanpuwanta u'uhpatewa inare'kenpuachachin ahkupui pa'mararewa”, tuhpi.





Napurawatuna, yunkipisuchachin iraru'sa, iminu'sa, peinena yahihpi se'nuke pa'satupi. Inaran inawanta ya'ihpi ya'wepisu nahpuchachin se'nu wenu ayuntupi. Ina wenu ayuntupisu u'uhsawatuna nu'pipi. Ina wenu se'nu ayuntupisu u'utuna nu'pipikeranchachin ahkupui pa'mapi.

Tawerinke, naniwachi nu'piri na'wetuwachinara ya'ihpichachin wenseintapirinawe, nu'pa ahkupuru ya'ihpi ya'wetupisurechachin, pe'tawatupisurechachin, ahkupuru pa'mapi.

Nahpuatun ninuntatuna napupi: Ni'kechiwachi iyaru'sa irahka nu'pa ya'weterewasu weshimarewa'. Ihpurachasu Muru kañu weshimarewa. Manuyacha we'etewa inapuchin nihkatewa a'naru'teke u'marewa'. Pa'awa kanpuanta ihsuru'teke ma'sha nihkatewa nanpiawa, tuhpi ninuntatuna'.

Ina ihpura panka sunu, Tai pantarinke. Ina sunusu Machiku itupi. Panka sunu ni'tun kamutechin nihpachina “Kuri Kuri” tuhsahrin. I'waraya nihpachina pari mahshupuchin sunu wankanai pihpiintawachina, ii aipi waniintarin kenanpi.

Nahpurawatun, Tai piyapiru'sa panka pihtaru'sa ya'karitapasu mema yu'napuna pa'pachinara, yunu tahshi nihsapasu Machiku sunu ahkupui kemapiru'sa, sanapiru'sa winarahpi. Pihtakepuchin tuntún, pirinan inapita piwituna nunkarurahpi nahtanpi. Tuken taweri nihpachina, ñuñu nihpachina yamira pirinan, panka pirinan, panka tuntún, yamira tuntún, kanpanan inapita irintupi nahtanpi.







Ihsu nishitu kanpuanta nuntatewa ahketchachin irahka mahshuru'sa sha'wipisu nitutatewa a'napitanta sha'witawa mahshunenpua sha'wipisu ama ayatakasumarewe. Inapuchin mahshunenpuasu irahkakeraware sha'wipisupita nisha'witatuna ihpurawanta ku ayaterewawe'.





## Pakuni piyapiru'sa tihkirinsu'

rahka tinpu Kunpanama mahshuya taransapatun pe'iapatapirinwe wi'napiuru'sari “mamahshuyatanta peike ku ya'weyahpatunwe, pe'inanke wekatun ina inawanta ku nuyaran sami mahshachinachinwe nihsarin”, ta'tuna ahkupui pihkumiitupi.

Nahputupirinawe kahtu kemapiru'sari, “ama mahshuyanta inaputukusuwe pinepachinpuwa”, itatuna ushiipi ni'tun panka pakunkeran acha'erinsu ina ihpura nisha'witawa a'napitanta nitutatuna a'napita sha'witakaisumare'.

Nahpuatun irahka Kunpanamari kahtu kemapiru'sa sha'witerin: Kahsu Kunpanamaku. Ku insunta chinihken nananterawesu nituterinwe'. Ihpurasu nuya piyapinkema ni'tun chimitapirawe acha'eramaku ni'keware. Paku manuhtun samira manamasu ka'ku'. Inaran shunkapi ma'ma a'nisawatuma paku inahpa muhtupi nininsuke nahpurupi tahkun ya'werinsu yunihsawatuna inake nanpeku' ituwachina, inapuchin kahtu kemapiru'sa nihpi.

Nahpuatun ahkemiachin pa'pirinawe a'na muhtupi inahpa nininsu kenankunpi. Inake a'na tahkun ihpuraware yankuhtarin kenankunpi. Ina tahkun ihpuraware yankuhtarin nahpurupi nininke nanperapatuna pe'satetupi. Ina tahkun se'pake pe'satetupike wenseskuntapi. Inake wenseatuna ninuntupi: Naniwachi iyaya Kunpanama sha'witerinpusuchachin nine'. Pa'a ninara'a, ma'ta unpukasumare Kunpanama chinihken nanantuna'pi naputerinpu', niitupi.





Ninaputasui, anpiantewanu'santa nanperapi: i'sa, chinsha, pa'para, suchiri, uhkurun, sha'a, yu'win, yante, yunkurun, winka, panpakuwe, nihsha nihsha anpiantewanu'sa nanperapi. Inaran nihsha nihsha inairaru'santa nanperapi. Ina nihkatuna napupi: “èUnpuatunta iyaya nihsha nihsha anpiatewanu'sa, inairaru'sa nanperapi. Ma'cha kanpusu nihkari nihka”, niitupi.

Ninaputatuna ninuntapirinawe, naniwachi i'watupi. Nani pi'i ya'kunapasu ni'pirinawe, pi'i we'sawasukeran u'kuri, “wensha wensha, wensha wensha” tenin ni'pi. Inaran ya'kariamiachin u'kuri, “wensha wensha, wensha wensha, tahkariin, tahkari terisarin wira” nahtanpi. Chinihken u'kuritasu, wiraitasu. Ya'ihpi pi'irute tahshiruri imuterin.



Ina tahshiru wankana, chihken u'kuritarin, chinihken wiraitarin. Inapuchin nihsasu, chinihken iwanechachin “weuuhh, weuuhh, shaahh, shaahh”, tehsarin. Nahpurawachina kemapiru'sasu ninuntupi: “Ma'wantacha iyaya kanpusu nihsare paya. Ihsupukasumarena ina mahshuya Kunpanamaku teninsu naputerinpu tii”, niitupi.

Nahpuasui, naniwachin nuya tahshirin kuwachi nanitupiwe kenantakaisu'. Nihpunawe chihken iwanechachin, u'kurirechachin u'nansu ku ta'terinwe'. Naniwachi wa'kichachin u'nanasu, nahtanpirinawe pamasu muhtupi i'shanaru'sa irintarin “shaaa... shaaa..” tehsarin i'shanaru'sa pamatatun.

Naniwachi kahtapini shunka taweri u'naninsu pihkdran kuwachi u'naninwe. Nihpunawe pamarisu panka muhtupi nihpirinwe mentahterin. Inaran tahkun inahpa wanipirinwe inanta se'pahkenkeware nihkantuntarin. Naniwachi u'nan me'tarin nihpunawe pamahsu muhtupi mentahtawatun nararu'sa inahpa wanirinsu mentahterin.

Tahkun inahpa nanirinsu nihpirinwe, inaihchin ku mentahterinwe'. Inake kahtu kemapi, anpiantewanu'sa, inairaru'sa wenseahpupi. Tahshi ni'tun ku nanitupiwe nikenanakaisu. Muhtupi wankana pamahsu shahtarin. Tahshi ni'tun ku nanitupiwe pama kenanakasu'.

Inake kahtu kemapiru'sa tahshi nihpirinwe wenseatuna tanawachinara ma'ma a'nipisu pi'pian pi'pian ka'sahpi. Ku na'kun ma'ma a'nipisu kapunaraiwe nuya tana nahterin. Inapuchin nihkatuna tahshi wa'ki wenserahpirinawe naniwachi ma'ma a'nipisu pe'yapi. Nahpuatun ninuntupi, “naniwachi ma'ma a'niresu pe'yare'. Ma'ta ihpura kanpusu kapariwachi” niitupi.





Nani wa'ki nihpunchachin tahkun yankuhtarin nanpepisu, naniwachi tahkun kanura nihkunin. Tahshi nihpirinwe tahkun kanura nihpirinwe se'watuna, ma'tuna ka'pi. Ina tahkun kanura massawatuna te'yatupirinawe, ya'kariamiachin i'ke "tu'wain" tenin nahtanpi.




Ina nahtanawatuna: —“Naniwachi iyaya pama winkintumasarin niitupi”. Napuatuna nuyamiachin kankantupi. Inaran naniwachi tahkun yakayasawasu irupi. Nahkeranchachin tahkun te'yaitantapirinawe sakuimiachin “tu'wain” taantaran nahtanpi. “Naniwachi iyara pama winkinteramasarin” niitatuna nuya kankantupi.

Inapuchin nihsahpirinawe, nani wa'ki nihsawasu tahkun nuya kayaterin ni'tun ina iruatuna tuhpi: Yahkun yankuhtawasu nanperesu, naniwachi tahkun kayarin. Nahpuakeraware a'na pi'ipuchin wa'kirare', niitupi ninuntatuna'.


Inaran nahkeranchachin wa'ki nihsapasu, tahkun mahsawatuna te'yatupinawe, “sha'ku” tenin nahtanin. Ina nahtanawatuna nuya kankantupi. Naniwachi iyara pama winkinterin, nahpuatumini nihsharuke tahkun anutatun “sha'ku”, tenin niitupi.

Inapuchin nahtanatuna nuya kankantasui, a'kayanpuchin suchiri, uhkurun perahkintarin. Ina nahtanawatuna “aria” naniwachi taweri ya'karitumara tii? Nanimini taweri ya'kariterin ni'tun a'kayan perana'piru'sa perahkintapi' ta'tuna ninuntasui shinsha “tehtetereen... tehtetereen”, tuhsarin nahtanpi.

Ina nahtanawatuna ni'pirinawe taweri wi'tunterin kenanpi. Ina ni'sawatuna “naniwachi taweri wi'tunterin. Ahpirawachi tawerianpitari”, niitatuna nuya kankantupi. Inapuchin kankantasui naniwachi tawerianpitupi. Inairaru'santa peratuna nunkarusapikeran yanpunatuna nuya kankantapi.



Nahpuatun kahtu kemapiru'sa tahkunkeran nuwarapirinawe,  
nu'pa tumate'ya, ku nara ya'werinwe'. Nihpunawe uhshakeran  
uhshakeran nararu'sa pahputuna nahkeranchachin na'antapiwachi.  
Tatamashu sha'witerinkusu ina kanta nishiterawe. Pa'awa ihstu nishitu  
nuntatewa, a'napitanta sha'witawa inapitanta nitutatuna ya'we'ina.



## Kahtu wi'napir'u'sari Kunpanama ushipisu'

rahka mahshukuru'sa sha'wipisu ihpurawanta ya'werahrin. Pa'pinari sha'witupisu nisha'witeratuna ku sha'wipisu ayatupiwe. Ina ihpura kanta nishitarawe. Pa'awa ya'ihpinpuwa ihisu nuntatewa a'napitanta sha'witawa inawanta nitutatuna a'napitanta sha'witanta'ina.

Irahkachachin Kunpanama ihisu nu'pake ya'weapun nihsha nihsha parichi ira iratehrantarin piyapiru'sa penenamare, ma'sha a'chintamare, ma'sha nihkakasumare, atarantamare. Inapitamare Kunpanamasu ihisu nu'pake pa'sahrin piyapiru'sa nuhsuruatun.

Nahpuru tinpu, Kunpanama a'na ira akurin. Ina ira muhtupiru'sakeran u'marinsu, ihshii parichi kankumarin. Ina ira pa'tatun nihsha nihsha ma'sharu'sa ihsuru'teke ya'werinsu ninin. Nahpurawatun sahkatakasu piyapiru'sa a'chinterin. Inaran piyapiru'sa penenin nuya ni'tuna ya'wekaisumare'.

Nahpuapunawe Kunpanamasu a'na taweri mahshuya taransawatun piyapiru'sa ya'nuterin. A'na taweri wi'napi taransawatun piyapiru'sa ya'nuterin. Inaran a'na taweri wa'washa taransawatun piyapiru'sa ya'nutatun nunterin.

Inapuchin iraterarinkeran a'na taweri mahshuya taransawatun piyapiru'sa pe'isapike pa'nin pe'iawatapun. Inake wi'napir'u'sari kenansawatun narintapí: ¿Ma mahshuta isunta nahpuunin ni'terin? ¿Tuma muhtutukunin? Naputatauna, wi'napir'u'sa tewarasapi.





Wi'napiru'sari yanpirasapirinawe, tehkarirasaririnawe kunpanamasu ku manta teninwe'. Sami yamahsapirinwe, uhseretupi. Inaputatuna wi'napiru'sari tewarasapi. Na'pirake Kunpanama te'yaratuna, tewarasapi. Wi'napiru'sari nahputerasapirinawe ku manta wi'napiru'sa nu'wirinwe'.






Kunpanamasu, nani ahkemiachin pe'ipike imatapirinwe, a'napita wi'napiru'sari sami yamahsapirinwe ahkupui muhteen pihkeitupi ni'tun i'sha u'urin. Inaputatuna wi'napiru'sari tewapi ni'tun, kahtu kemapiri mahsawatuna ushipi ni'tun “yusparin” iterin.

Kahtu kemapiru'sari kunpanama ushisawatuna, wi'sapiru'sa naputerin: “Ama mahshuyanta inaputukusuwe pinepachinpua'. Mahshuru'sasu ku narinterewe, ku tehkarirewe. Inahsu nihpirinwe pa'payari a'piterin. Ku kanpitasu mahshutapumawe ni'tun mahshuru'sa tehkarirama, iterin.

Kemapiru'sari ushiwachinara, Kunpanamasu kemapiru'sa nuntatun naputerin: “Ma nuya piyapinkema ni'tun kanpiataasu yachimiitapirawe ushiramaku. Ihpura taweriru'sa na'kun wi'napiru'sa, mahshuru'sa, sanapiru'sa ku nuyawe yunkipi. Nahpuatun yunkirawe, pakunkeran piyapiru'sa ata'wanta'wasu'. Kahsu nihpirinwe Kunpanamaku, na'kun piyapiru'sa nuhsurupirawe, na'kun na'kun piyapiru'sa ya'wepi ku nuyawe yunkipisu ni'tun inaputarawe”, tenin kahtu piyapi nuntatun.

Nahpuatun kanpita kahtu piyapinkema kahtawaramaku ku chimiiterawe ni'tun kahtu piyapinkema pakunkeran acha'ehsarakema. Paku peinemake pa'maku. Nani peinemake kankumawatama, manutawatuma sami manamasu a'naruahchin anpirawatuma ka'ku'. Inaran a'naya a'nayakenma shunka ma'ma a'niku'.





Nani ma'ma a'niramasu a'npiwatama paku a'na muhtupi inahpa nininsu yuniku'. Inake a'na tahkun inahpa wanirinsu yunihsawatuma inake nanpeku iterin.

Nahpuatun kahtu kemapiru'sa sami nuhtuwaru nu'pirapirinawe, inawasu nunshirawatuna peinenake u'marawatuna Kunpanamari sha'witerinsuchahchin nihpi. Nani sami mahpisu manutawatuna anpirawatuna ka'pi. Inara ma'ma shunka ma'ma a'nipisu pi'ihpachina ina mahsawatuna panka muhtupike pa'pi.

Panka muhtupike kankunpachinara a'na tahkun inahpa wanirinsu kenanpi. Ina kenannawatuna ihesu Kunpanama naputumara ta'tuna inake nanpepi. Inapuchin irahkakeraware mahshuru'sa sha'wipi Kunpanama panka pakun a'parin piyapiru'sa ku nuyawe nanpipi ni'tun atahkiiterinsu sha'wipi. Nahpuatun mahshuru'sa penentuwachinara napupi: —Ama mahshuru'sa narintukusuwe. Mahshuru'sasu payaru'sa narintuwatera pinerinpu. Inapuchin mahshuru'sa, payaru'sa, tataru'sa, mamaru'sa a'kayan wa'waru'sa penenpachinara nuntupi.

Nahpuatun ihpurawanta mahshuru'sa, payaru'sa, wa'waru'sa a'kayanpuchin penenpachina inapuchin penenin. Penenatun kankan ayunkirin nuya yunkimatun ya'wekasumare naputerin. Inapuchin kanta tatamahshu, mamapaya irajka sha'witerinkusu ina ihpura sha'witarankema kanpitanta nitutatuma, wi'nama, wa'wama penenama nuya yunkiatuna su'suwachina shawichachin nuya yunkiatuna nanpikaisumare'.



## Irahka shawi piyapiru'sa amana nuntupisu'

**P**a'a sha'wichinkema kanpitanta ihisu kirihka nuntatuma a'napita sha'wituku nituchina. Wa'watapu mamapaya Irihseriya ku'wara chiminyanterasuwe, tahshi nuhpachina nuntuwachinkuira napurin. Irahkachi shawi ninanuke kanpu piyapiru'sa ya'wepisu amana nuntupi.

Shawi ninanu ahkete a'na panka tawan Mashi tawan itupisu, namui muhtupiri nasu nukurarin. Ina tawanke amana ya'werin. Inake Amana ya'weatun pihta ya'karituwachina Shawi ninanuke u'mapi. Kemapiru'sasu tananke ka'nanu'sa yunihpuna pa'pi, pihtamare. Ya'were sanapiru'sasu pihtake u'ukaisumare nahpiterantapi.

Nahpuru sanapiru'sa pihtamare nahpitasui Amana sanapiru'sa u'mawachinara, sanapiru'sa nuntupi: "Nahpitarama kai, kanta wenutawainkema", itawatun yawira wenusarin wenu uhpurutamare'. Nahpuachina shawi sanapiru'sari iterin: "Ama kai kemahsu wenutekesuwe. Nuya kaura wenutarawe", iterin.

A'na taweri u'machinara Shawi sanapiru's iminke yapaasui kenankimachinara inawanta iminke imahtatun sanapiru'sa pahkatupisu inawanta kahtawatupi. Kinan yahpanpisu, ki'sha wa'tupisu, ki'sha i'supisu inawanta kahtawatupi.

Inaran peike u'masawatuna ki'sha pa'murawatun, ki'sha pihchatu pihchatu itawatun we'ehtake a'yutuwachina inawanta inake kahtawatupi. Nani ki'sha pi'ihpachina




yapahsatupirinwe, yawenutupirinwe ku shawi sanapiru'sa nuwantupiwe ni'tun ku wenutupiwe'. Inasu ku ki'sha wenupiwe. Ya'wira inawasu yawenutuna napupi.

Amana sanapiru'sa, Shawi sanapiru'sari ku ke'yapiwe, ku inasu kanpu sanapipuchinwe ni'tun inaputupi. Nahpuatun Mashiru panka tawanke panantapi. Amanasu nihpirinwe, Mashiru kanun tawankenta ya'wepi. Inaran pihta taweri u'mawachinara inawanta nansapi.

Amanasu nihpirinwe, pihta taweri werun yanimenrinsuke nichinpitu nichinpitu tuhsawatun tanpa iwa pitenawatun nansarimasarin. Amana u'marachinara, nansanchiru'sa shi'nara nitunpupa'wehsawatuna, yamira pirinan, yamira tuntún inapita pi'nirawatuna nahkapipi. Amanaru'santa nansapunapuchin tawere, tawere ta'tuna ya'karipisu iwahketapi.

Nani pihta na'wepachina Amanaru'santa Mashiru tawan nuniteraruke, Mashiru kanun nuniteraruke panantapi. Inapuchin Amanaru'sa nihsahpi Shawi ninanuke. Ku inanta Shawi ninanukeahchinwe Amana pihta taweri ni'tupiwe. Tai pantarinke, Santa Maria, Warankita inapita ninanuke pihta na'wepachinara inakenta pa'pi ni'tapuna.

Mashiru Tawan nuniteraruke, Mashiru kanun nuniteraruke Amanaru'sa ya'wepi. Inakeran u'mapirinawe, a'na taweri wa'waru'sarahchin ya'werahpi kenankimapi. Nahpuru niterateen se'kumarawatun wa'waru'sa airutupi. Inapuchin wa'waru'sa nitupi ni'tun sha'pitawatuna chiminpi. Inapuchin nihsahpirinawe a'na taweri a'na mahshuyari wa'narin: Tananke, iminke wi'nama paterama'su Amana u'mawachinara, niterateen se'kumarawatun wi'nama airutupi ni'tun tahkirapi.





Ama ahkete wi'nama chinakaisumarewe, kuhshi chimiwite, ni'nira chimiwite inapita Amana ya'werinke te'yatuku'. Inaputuwatama inakeran pihpirawatuna ahke pa'sapi. A'naken kanun parihchi pa'sapi. A'naken muhtupi parihchi pa'sa'pi', iterin we'enke. Ina mahshuya inapuchin wa'narawatun piyapiru'sa shawituwachina. Shawi piyapiru'sasu kushi chimite, ni'nira chimiwite inapita amana ya'werinke te'yatatuna naputupi: Wa'naterenken wa'nateranken, Wa'naterenken wa'nateranken. Muhtupi parihchi, kanun parihchi paatuma ya'weku', itawatuna te'yatupi.

Naputuwatuna, ni'nira chimipite, kuhshi chimipite te'yatuwachinara inapita chanatawatun tawan nanichachin na'kun anawanpachina Amanaru'sa muhten ikitatuna na'nerantapi. "Ayau ayau, ayau ayau. Ayau ayau, ayau ayau", tuhsapi muhte ikitatuna'.

Na'netuna napurapikeran tuhpi: Pa'awa nihpachi yankeatewa, a'na parihchi pa'awa'. Shawiru'sa shuntasarinenpua ta'a, tuhsapi. Inaran ninuntapi: ěIntuwata kanpitanta pa'sarama? Kiyasu kanun nuniteraru ya'wetapui pa'sarai' ěKanpitapu intuwata pa'sarama? Kiyasu muhtupi nuniteru ya'wetapui pa'sarai', tuhsapi na'nepunapuchin ninuntatuna'.

Inapuchin irahka Amana Shawi ninanu ya'kariya ya'wepinawe, inaran u'matuna kanpuware pihta taweri ninuntupi. Nihpirinwe ihpurasu nihsha nihsha parihchi paatuna ya'wepi. A'nahken kanun nuniteraru ya'wetupi. A'nahken muhtupi nuniteraru ya'wetupi. Inapuchin irahka mamapaya Irihseriya sha'witerinke.



## Nihsha nihsha kañuru'sa nunenakasu'

rahkaraware mahshuru'sa, mamapayaru'sa nituninunenakasumare a'chinpachinara napupi a'chinatuna', ihseke a'naya a'naya sha'wiarawe. Pumawatera nanpiruwa nuwanteresu. Irahkarawere kanpuasu ya'werewake nanpiruwa sha'newasu ya'weterinpuwa.


A'na taweri kañupatera, pumatuwatera, se'nanpu ikituwatera nanpiruwa mahsawate ninunenakasu yunkire'. Munuhken senasawate pa'chike se'muitere, inaran nani tahshisapasu aipiranke akusate a'petere'. Inake purunkairi se'kutekasumare'.

Tahshiramiachin nihpachina we'erekeran wenseintasawate ku piyapi nuntarirawe pa'ne nanpiruwa se'muate pachike akuresu mahkunsawate pi'pian u'ure, inaran pumateresu ahpira ahpira pahshitere'. Nani tahshiraya inaputere, inaputare nani puma pa'mawachina nahpuruware tanawitere'.

Inaran taantapi, sanapiru'sa nuwanpirake ninunenpisu'. Sanapiru'santa tahparunena ikituwachinara, a'na taweri i'shapuchin tahparunenenkeran we'shimawachina, tahshiramiachin wenseintasawatuna pa'pi nanpiruwa munu mahkapuna. Shunka munu senasawatuna pa'chike se'mupi, inaputawatuna tahshi nihpachina aipiranke imutawatuna akupi, inake purunkairi se'kuterin tawerianpiterin.







Nahpuwachina a'ka'yan nihsapasu sanapisu wenseitasawatun inake nuyasha nipa'murin. Inake nani tahshiraya ninunenin nuyatakeware'. Sanapi inapuwachina ku naniterinwen uhsha nihkakasu. Inake ninunensapunawe ku na'tuwachinwe ku unpuruteranta nuyaterinwe. Nisawatun ku kehken ma'sha pe'pesarinwe.

Inaran taantaran, imuwatera nanpiruwake ninunenesu'. Imui kañu mahpchinpura, nanpiruwa kara nimu mahsawate i'sha aunpiitawate inake a'itere, nani wa'kimiachin nihsapasu a'pisawaate weyai weyai nihsapasu u'ure'. Tahshiramiachin u'ure inaran i'wayara nihsapasu nahkeranchachin u'uantare'. Nani sanutuwachinpura nahpuruware tanawitere'.

Inapuchachin kankan kañu mahpachinpura, nanpiruwa munu masawate a'itate u'ure. Kankan shinpiipi ya'wepachina ina ayuntawate inapitare u'uhpatera a'naruachin sanutumarinpu'. Inaran taantaran, ya'pira kañu mahpachinpura napiruwa numuke ninunenesu'.

Irahka kanpu piyapiru'sasu ya'pira kañuri mahpachina ku nimiru pa'anakaisu yunkipiwe. Nanpiruwa kanu munu nininsu mahsawatuna pa'chike i'sha ta'pansawatuna inake akuitupi, inaran aipiranke atawerianpitupi, nani taweriwachina mahsawatuna inake nuyasha nipa'murayapi, tahshiramiachin naran i'waraya nihsapasu nipa'murayapi. Inake nipa'murayawatera kuwachi pi'ihke pihpirewe', ku nuhka ka'newe', ku na'kun yamura ka'newe', ku pensha ya'karirewe'.



Inaran taantarin, yawa'tan a'tentuwachinpura nanpiruwake ninunenesu'. Yawa'tan a'tentuwachinpura nanpiruwa nihterinsu mahsawate nuya se'numusawate inake nipashitere, inaputate na'kurumiachin nipashitere, nani pi'ñuhteresu yanimawachina nahpuruware nanapiterewawachi.

Inake nipashituwatera kuwachi amarewe ama a'naruachin sukikasumarewe'. I'shari ma'kutuwachina kuwachi a'naruachin nuyaterewe'. Nisawatun nuhka, aruse, shi'shi, sami natewan nihsapasu, ka'nanu'sa natewan nihsapasu, wihtuna'pi inapita kuwachi ka'newe ama u'yutamarewe'. Yawa'tan a'tentuwachinpura samihtera'wa kankatupinan inasaa ka'ne'. Inasu nihpirinwe ku u'yuterinwe.

Inaran taantarin, tewe kañu mahpachinpura nanpiruwake ninunenesu'. Irahkachachinsu nihpirinwe piyapiru'sa tewehtuwachinara ku warumasiake nimiriu pa'anatuna kapatuna nuyatupiwe'. Tewehtuwachinara napiruwa munuhken a'naterahpu mahsawatuna a'imetupi, nani wa'ki unpituwachina a'pisawatuna inawachi u'uhpi. Inaputatuna tapahken nihpirinwen tahshiraya tahshiraya u'utuna shunka a'naterahpu taweri ananipi.

Ina u'upachinara atari, kuhshi, uwaka inawita ku ka'piwe, nihsawatun ku tumahkenteranta ka'piwe', ama nahkeranchachin tewe kañuri ayantumantamarewe'.

Inaran taantarin, piyapi ainen anutawachina shihpi nuwanteresu'. Kanpuwasu ya'werewake nuhtuwaru shihpi ya'werin, kanunan, a'shinan inawita tawirawiterinpuwa ya'werewa'.



Ainenpu nuwatatun sukimuhtusawatera, tahshiramiachin wensesawate ku wenu u'uhpurirawe saweni mahsawate pa'ne shihpi kanunan yunite itehken uhkuikasumare'. Nani kenanpatera wayunsawate nuya ni'sawate pi'i we'sapaeran inaran pi'i ya'kunsapaeran, wanipasawate nuntere', inake sha'witate itere': Kanta kemahpuchin tarihchin tarihchin aинchi itarekeran kanuite nininsu uhkuire', inaputate na'kun yuntusawate inara pa'musawate pahsatere'.

Nuya pahsatawate inake nipashimuhtutere. Nahpuwatera a'na ya'ipi taweri kuwachi amarewe, tahshiware nani nuya se'kutewachinpura nahpuruware amarewachi. Nani taweri inaputate shunka taweri ananire'.



## Ya'wan ketewachinpura shihpi kanunanke ninunenesu'

rahka a'na piyapi tanpunenke pantaatun ma'sha yunikasu yunkirin. Nahpuatun irahpa mahsawatun tanpunenke'pa pantasapirinwe, wankupi shihpi shitaterinsu kiramani ka'sarin kenankuntarin. Nahpuatun kunitawatun kiranman inanamare pa'sapirinwe, ku kenanatunwe na'shi pi'pihshachin shii'naterin. Piyapisu pa'yanenke yaituhsawatun ahke niisawatun irake'pa pahshiteintasawatun nahtanpirinwe nuhtuwaru muhturupuchin taratawatun a'naruachin irake'pa nite'yatiintarin.

Ina ni'sawatun irahpa nuya se'kesawatun ira ta'atapirinwe nashiri ihkantatun keterin.



Nahpuwachina, chinihke kankantiintasawatun mahshuru'sa sha'wipisu makesuna ya'wan ketewachinpura ninunenesu, ina yunkisawatun pa'nin shihpi nanunan nininsu namenen nihshitawatun yakinen materin. Inake pashitawatun shunpi kepasarinsu uhkuisawatun ya'wan keteana tunputerin. Inaran yunkiantapirinwe, iyainta nahterin tuhpisu yunkimarin. Nahpuatun imirinke iyasawatun u'urin.

Inaputerin ni'tun amasha nuyamiachin sanutumarin nahtanpachina ya'werinke kankimarin.

Nanhpuatun irahka mahshuru'sasu sha'wituna napupi, ya'wanawatama paku an'naruachin shihpi kanunan yunihsasawatuma namenen nihshitawatuma yakinen matuku', inake ya'waana nuya pahshitawatuma nuya tunputuku', ina nahterin tuhpi mashuru'sa sha'wituna.

Piyapi ya'wanana'pi nihcpachina ama ahketchachin nihkamarewe, ama puma pankatamarewe kuwachi kayuruni ya'karirinwe, ku nunkarupike ya'werinwe, ku peen ya'karirinwe, kemupinenpita ku inateranta nuhka ka'piwe. Ahketchachin nisawachina nahkeranchachin shihpi kanunan maantasawate ina yakinenkechachin pahshitaantare'. Inaputate tahshiraya tahshiraya pahshitere nuyatakeware'.



## Sanapi washirun nihpachina natiu u'urinsu'

**S**anapi washirun nihpunawe ku nuyahsha na'tatunwe kañupachin, a'naruachin natiu iwasawate, na'kunmiachin yuntunsawasate tu'nare', inaran a'itawate wenukai wenukai u'shitere. Ina ahpira ahpira u'shitawatera a'naruahchin nuyaterin. Ya'were ku inaputuwaterawe chinihken sapusawatun inaran wa'yantawatun naniterin chiminaku'. Irahka mahshuru'sa sha'wituna napupi: Natiusu nihpirinwe wa'yanen ya'weterin, piyapichahchin nihpunawe nuhtuwatu shinerateen ya'weterin. Nahpuatun kañuwatera, a'na taweri muhtu ikituwatera, iru mahpachinpura natiu mahsawate u'karire'.

Nihawatun, a'na taweri piyapi yu'namen ikitatun chi'chiipachina, natiu mahsawate tu'nasawate ina u'shitere', nihpunawe pi'pian pi'pian u'shitere, ama na'kun u'uhpatun anpi kankanamarewe'. Tatamashuru'sasu, mamapayaru'sasu natiu mahsawatuna tu'napi inaran puteriake ta'pansawatuna nu'pake pa'pitupi. Nani kanchise taweri nihsapasu uhkuisawatuna ahchinpuchin nihsapasu u'uhkintapi. Ina u'uhawatuna a'naruahchin i'ke pa'pi amapuna. Ya'were ku amapachinaraiwe natiu wa'yani pinewachina a'naruachin akatupi, inamare natiu u'uhpachina nani taweriya a'kayanpuchin amapi.

Nahpuatun a'nahken ina u'utuna ku ikirupiwe, ku tuhtuwite ikihtupiwe. Nahpuatuna mamapayaru'santa ku pirake pahkeatuna pa'piwe'. Natiu u'uhpachinara kuwachi nuhka, yamura inawita ka'piwe'.



Inaran taantapi, ama nate ikitamarewe natiu u'ure'. Nate ikituwatera natiu pahsatawate insehinsuna nani pe'turipu inataechachin pu'mutere', wa'kimiachin nihsapasu nuhtuwaru pi'karinpu, ina nihpirinwe ta'tate awantere'. Ahpira ahpira natiu pu'mutuwatera sanumantarinwachi. Ihkin pi'katerin ni'tun ka'chura'wapuchin nateanake ya'werinsu chiminin. Ya'were ku inaputuwaterawe, nate pe'yarantasawatun ya'ipi pe'yaratewachinpura kanpunta nukiratetere'.

Inapuchachin, iru mahpachinpura natiu pahsatawate u'karire'. Inaputuwatera a'naruachin irunta na'weterinpu, kuwachi sapuanterewe'. Nahpuatun iru mahpachinken ama natiu te'watekewe', a'naruachin natiu mahsawatun pahsatatun u'karike'.

Inaran taantapi, ta'tawatera natiuke nuyateresu. Piyapi ta'tawachina na'keran natiu mahsawate pahsatare', nani tumaruhshin pahsatuwatera ayanihsawate inake nuyasha pa'pianatere'. Na'kunmiachin akutawate me'nete mahsawate inake tunputere'. Natiuke tunputuwatera nuhka, yamura, akiruwa, miyuhki, tu'wana, wa'se, warahte, inawita kuwachi ka'piwe, ama ahkete nihkamarewe'. Mahshusu nihpachina ku nihpun payasu nihpachina ku uhsha nihpiwe.

Ta'tamaresu nihpachina a'na yuhkipuchin natiu u'uhpi, nihsawatun ku ketetun ka'piwe, ku main wenu u'uhpiwe. Nani tahshiraya natiu u'uhpachinara inaran nuya na'tuwachinara nahpuruware nuyatupi. Ya'were ku nuya na'tuwachinaraiwe ku a'naruahchin nuyatupiwe'.







## Kahpari nuhkakeran nimiriu ninesu'

**N**a'kun na'kun pisu ya'wetuwachinpura kahpari nuhka mahsawate, ya'pirin inkitawate inaran peenke awenukatawate nipahshiratere. Insechinsuna pisu pihpiterinpu inataechachin ya'ipia pahshitere'. Nani taweria inaputuwatera a'naruachin pisu inkire'. Nahpurawate kuwachi kusharu tumatun ka'newe, ku pi'i nahtanewe'.


A'nahken sanapi wa'wawan nihpachina shu'shunen ikitawatun panka pumaterin. Nituhuna'pisu nihpachin kahpari nuhka werunen mahsawatun a'imetawatun inake ahpira ahpira nipa'musarin ama ahketechachin pumatamarewe'.

Ku inaputuwachinwe, puma nuhpuitawatun naniterin nuwarutakasu. Inaupachin naniterin sanapi kahpari nuhka werunen senasawatun, inaran pahsatawatun inakechachin nipahshitakasu'. Nihpunawe inasu nihpirinwen ikinmiachin.

Inapuchachin yawatan a'tentuwachinpura, kahpari nuhka mahsawate nuya pahsatawate inake ya'pia pahshitere. Inputuwatera kuwachi nuhka ka'newe', ku main wenu u'urewe'.

Kankanenpunta ikituwatera kahpari nuhka werunen senasawate ayanimere', inara nuyahsha ninutawate wa'yanen perahawate sha'witere nunenainpusumare, inaran nipahshikankantere. Nani nipahshituwatera pi'i ya'kunsapasu parihchi ku'ianke te'yaterewachi ama wa'waru'sari ya'kariatun ahchitamarewe'. Nani yawe'ehpatera inaputaantare'.





## Ananankeran nimiriu ninesu'

Tatamahshu a'chinatun napurin, piyapi kankanen ikitatun ku awantuwachinwe, ananan itehken iwasawatun munuhkenechachin a'itawatun wenukai wenukai nihsapasu keteke u'uin. Inapitawatun sha'witeke wa'waru'sa ama nunkaruinawe, ama ananan wa'yaneni ahkete nitamarewe. Wa'kimiachin nihsapasu nuhtuwaru unkasawatun sanutumasarin. Inaputapiranwe ku unkatuwachinwe, inasu nihprinwe nani wa'yaneni paterin, inapuwachinsu ma'sha unpukasu ya'werin.

Suhsaikeran kañuwachin, na'keran ananan uhkuisawatun, tanpuke kañapi kepasawatun inake ananan u'shitawatun a'paike'.


Kañapi ananan u'uhpachina nu'pitawatun ananan wa'yanen kenanterin, inake kanintun kanintun yankuru'sapuchin a'pianawanin kenanin. Nuyatakasu nihpachina inake wa'yani nunenin a'naruahchin kaña'pi nuyaterin.

Kañapi nunensawatera ku wenu u'urewe, ku kaña'piteranta wenu u'urinwe, inanta nihpirinwe a'nipisachin u'shitere'. Nani nuyatuwachina peike kentarewachi, nihpunawe ku a'naruachin wenu u'urinwe. Nani nuyaterinsu pihkeran a'ka'yan wenseatun nani taweriya amarin ama akatamarewe'. Ananan pinewachinpura a'naruahchin akatate wirihtere'.



Inaran taantaran, miyuhki wihpachinpura ananan akuteresu'. Piyapi miyuhkiri wininkeran nuwarutawachin, pake na'keran ananan iwasawatun iwike inaran akirutawatun inake pa'pianatawatun tunputeke'. Ama nahpuapunawe a'naruahchin i'shiritekesuwe'. Anananke nunenpatera ku nuhka a'karewe, nunentuna'pinta ku nuhka ka'ninwe, ku yamura ka'ninwe, ku wenu main u'urinwe. Nani nuyatuwachina, ananan iwisawatun munuhkenpitare a'iterin inaran puteriake pu'musawatun nu'paruke pa'piterin, nani a'na semanapuchin nihsapasu uhkuisawatun nani tashiraya a'ka'yan u'uhkintarin. Nahpuatuna kanpu piyapiru'sasu ku sanpate taranpiwe'.

Inaran taantaran, ananan nuneninpusu'. Piyapi na'kun na'kun te'narin ya'kunterin ni'tun kañupachina, a'kayan wenseintasawate ku wenu u'urirawe pa'ne tananke ananan uhkuiari. Nani ananan kenankunpatera ku chinihken iratarirawe uhshakeran ya'karisawate inaran amuru se'tamusawate su'na su'na tarekeran a'shinen nahtansawate a'naruahchin uhkuire'. Inaputate na'kun uhkuire, nani kahtu shunka itepuchin uhkuipatera peike kemasawate iwire inaran a'itawate kaña'pi keterewachi u'ukasumare'. Inaputate nani taweri u'shitere'.



Muhtu ikitate kañupatera inamarenta ananan nahterin. Iwisawate u'karire', inaran i'shake shipitawate nikahkure'. Inaputuwatera a'naruachin muhtu ikitaresu sanutumarinpu'. Kuwi inkikamare ananan nuwantuwatera, ihpuraware yuhki pihpintasapasu na'keran werunen mahsawate tu'nare', inaran ne'meterinke se'shiisawate nu'wihken u'urewachi. Iru mahpachinpura inamarenta ananan u'ure'. Ina u'uhpatera a'naruachin iru inkire'.



Iru ya'kuntuwachinpura inamarenta ananan uhkuirawate munuhkenpitare a'itawate tahshira tahshira u'ure, inake a'naruachin na'weterinpu'.

Atari kañu mahtatun atari tihkisawachin, ananan iwisawatun inahpuchachin atari u'shiteke'. Inaran na'kun munuhken mahsawatun a'peke', kunaike ya'ipi pei atawihsteke atumuntatun'. Nahputuwatan atari kañunta a'naruahchin tawesarin.

Wa'washa nituhtuna'pi nihkakasu nuwantuwachinara, nani yuhki minkuantapasu na'keran ananan nuntawatuna iwipi, munuhken mahpi. Pei ya'kari kentasawatuna inake a'itupi, nani a'itawatuna amasha te'naisapasu wa'washa amatupi inaran u'shitupi.



Nahpuatun wa'washa su'susawatun wi'napituwachin, sanapia'wanta nanuntuwachin nituhtuna'pi nihsarin. Nihsawatun ku sanpate nihsarinwe. Inkarisuna u'shiterin ina piyapinta nihpirinwe ku nahpinantaranwe ama wi'napi, sanapi tapikasumarewe'.



## Anawahkake ninunenesu'

**S**anapi washirun kañupachina, nani a'na semanatapasu anawahka senasawate a'imunutere', inaran nani i'waraya nihsapasu washirun aipiranke kepamasawate amatere'. Inaputuwatera sanapi ku kañurinwe. Inakechachin wa'wina'wanta amatere.

Wa'wina'wasu amatakasu nihpachina, imuhturate mahsawate peenke a'pere, nani kewahshin nihsapasu a'pisawate anawahkaike te'yaitere'. Ina tumuntapake wa'wina mahsawate pehpatere'. Nahpuru wa'wina na'netun shura tuhpirinwe ina awantawate pehpatere'. Inaputuwatera wa'wina ku kañurinwe.

Inake pehpatapikera, nani kara taweri nihsapasu, nihsha nihsha nara munuru'sa mahsawatuna a'imetupi inaran imuhtu a'pesawatuna pu'muitupi, inaran nani te'nai nihsapasu wa'wina mahsawatuna amatupi. Inawinatamare anawahka neweterinpu. Ya'werewake ihpurawanta anawahka ya'werin.

Wa'wina na'kun na'kun na'netun imerinen pumatuwachina, anawahka mahsawate inake imerin pahshitere'.

A'nahken piyapi ku yuse imahpisupitawe, nani wa'washa wa'watuwachina wa'yani yakemarurin. Nahpuwachina wa'winanta ahpira ahpira na'nerin.





Nitutuna'pisu a'shin nihpachina a'naruahchin anawahka mahsawatun ina su'nasawatun aimeterin, inaran inakechachin ya'ipi pahshiterin. Nahpuruware a'naruachin wa'wina tunamarin.

Chinutunkenpunta  
kañuwatera, a'na taweri  
kankanenpu ikihtuwatera  
anawahka mahsawate  
nipahshikankantere',  
inaran pi'pian u'ure.  
Sapusawate muhtu  
ikituwatera inaputerechachin.  
Nahpuru a'naruahchin  
muhtenpu sanuterinpu'.



A'nahke sanapi tahparunen ikituwachina anawahka mahsawatun a'imetawatun u'rurin. Ina u'uhpachina sanutumarin nahtanin.

A'naruahchin wa'washa wanikamare anawahka mahsawate peenke awasawate inake pahshi tu'tuwitere. Nani taweri Inaputuwatera a'naruahchin wa'washa wanitun iraterin.



## Pi'shiru kankan kañu nahterin

rahkakeraware kankan kañu mahtupirinwe pi'shiru munuke nunenamen nihkate u'ure'm tuhpi ihpurawanta tatamahshuru'sa mamapayaru'sa. Kankan kañu mahpachinpura anawaka mahsawate a'imetawate weyai weyai u'ure, inake a'naruachin pahsaterinpu'. Nahpuatun ihpurawanta iminke sha'ne. Pi'shirusu nihpirinwe ku a'siantemareahchinwe, inasu nihpirinwe kañuwatera nimiru nihkate u'ure.

Sanapi wa'wa ikihtatun ku naniterinwe waikasu nihpachin, pi'shiru yanku munuhkenechachin mahsawatun a'itawatun keteke u'uin. Ina u'uhpachin tahparunen amahshamiachin pankatuwachin wa'washanta pihpisarin.

Nahpuatun a'na taweri a'nahken sanapi wa'wa ikitupirinwe ku ina u'shituwachinaraiwe, chiminin.

Inaran taanpi, sha'we pihpituwachinpura pi'shirurayake nunenesu'. Sha'we iteresu pihpituwachinpura pi'shiruraya mahsawate iwire inaran insehinsuna sha'we pihpiterinpu ina ya'ipi akutere'. I'waraya nihpachina akutere, tahshirayamiachin akutaantare', inaputawatera uhsharan uhsharan sakumarin.

Pi'shiruraya yamahpatera nani iminke kankunsawate pi'shiru se'pahken wentatawate nuntere'. Sha'witere wa'yanenkeran piyapi anuyatakasumare'. Inaran taantapi, ikin iyawatera pi'shiru u'ure'.



A'na taweri ikin iyawatera, pi'shiru munu, pi'shiru yanku, pi'shiru ite', inawita mahsawate a'itere'. Aunpihtere nani kaniitun nihpachina a'pisawate piwite piwite u'ure'. Nani wa'kimiachin nihsapasu ahpira ahpira yaiyare. A'na taweri se'nanpu ihkin nahtansawate ihkin iyare'. Inapuchin nantanwantan ama kahkutekewe, a'naruahchin pake pi'shiru yunitun nunenamen nihke'. Mahshuru'sasu nihpachin ama uhsha niinasuwe. Ku na'tuwachinwe ku nuyatarinwen.



## Ahtekeran nimiriu ninesu'

**C**hinhken sapuwatera ahte pihshutawate nuyahsha iwire', inaran ninare nani nu'wihken shi'tawachina pa'chihke yuntunsawate inawachi kaña'pi u'shitere. Chinutun nihpachina kahturu u'shitere', tahshiramiachin inaran i'waraya u'shitaantare'. Wa'washa nihpachina miria kuhcharasa u'shitere'. Ahte u'uhpachinara kuwachi wenu u'uhpiwe, panta'pi, sha'pun, kayapin inawita se'muatuna inasachin u'uhpi.

A'na taweri ya'kaate pumatuwatera, ku puma tahsapimawachinawe ahte iwisawate kushi tuma ayutawate nuya chinisawate ahpira ahpira pahshitere. Tahshiramiachin, i'waraya nihsapasu pahshitere'. Ahteri se'kutemawachina puma a'naruahchin pa'masawatun wenairu ihsa'pitepuchin nihsapasu sakumarin.

Ku piyapi inaputuwaterawe wenai tachitumasawatun kanseri ya'weterin. Nahpuatun na'kun chiminpi a'na taweri. Inaran taantapi, ahtekeran nimiriu nihkate nuwaru kayu ayatere'.

Piyapi wa'watapunkeraware chinhken sahkatuwachin, kehken ma'sha pe'pewachin, nani mahshutapunchin yanuwarakayuterin, nahpuwachina se'namen ikihtarin. Inapuchin piyapi nahtanpachina ahchinpuchin wenseintasawatun ku inshateranta nuntapunawe pa'nin ahte iwipun.



Nani iwisawatun akitawatun inake nitunpukayuterin. Nahpusawatun kuwachi sahkaterinwe ama ahkete nihkakasumarewe'. Nihsawatun kuwachi sa'ini we'eparinwe, inaura a'na semanasaa we'erin. Inapatun ninunenpachina ku wenu u'shitupiwe, nuhka, tumakeran kusharu nihpisu inawita kuwachi ka'ninwe.



Inaran taantapi, piyapi u'mahpiwachina ahtekeran ninuneninsu'. Kemapi puma kayutuwachina u'mahpirin itere'. Wi'napitapun a'na a'na sanapi nuntatun uhsha nihpachin, nani mahshuterapun kayu ihkin nahtansarin. Inapuchin kemapi nahtanpachina ahte werunen yuntunsawatun ayanirin, nani nuya yanihtuwachina se'numuatun yanu ataranterin.

Ya'we'ehpachina inake se'namentaechin nani tahshi nipahshiterin. Inapatun a'na yuhkisaa ananirin nuyatakeware'. Ku inaputuwachinaraiwe kemapi ahkete nihsawatun chimin.

Ihpurasu inanpi ya'wetuwachinara uspitaruke pa'pachinara inake a'naruahchin nuwitupi. Nihpunawe pa'tunkeran ku nanitupiwe nuya nimiriuchachin ketakaisu.



Nahpuatun inanpi kemapi ya'wetuwachina yunkirin nara  
sha'weteru'sake ninunenakasu ama ahkete nihkakasumarewe'.

Inaran taantapim, ahte munuke nipehpatupisu'. Tatamashu  
sha'witun napurin: Piyapi mahshuru'sari, mamapyaru'sari  
pinewachina we'eitesaa ketaanterin, chiruhte kihpariterin,  
anawate kihparitrin. Nahpuwachina piyapi tanan pa'tuwachina  
ku manta kenaninwe. A'na taweri ya'ipi taweri tananke  
iratupirinwe kumanta kenanatunwe tuhpinan peinenke  
wenantaran. Nahpuwachina a'na taweri sa'ini iterin: ¿Unpuatunta  
kemasu tanan pa'tuwatana kumanta kenananwe?, iterin.

Sa'ini naputahpachina tatamahshuini penenatun sha'witerinsu  
yunkirin. ¿Ma'cha kahu sa'awe naputerinkupaya?  
Tuhsawatun pa'nin ahte munu, ahte sha'wete inawita  
mahkatun a'itatun nipehpatakasumare'.

l'waraya nihsapasu a'iterin, nani tahshi nihpachina  
inake nipehpatawatun pa'nin we'ehpun. A'ka'yan  
nihsapasu kahpayatiintasawatun pa'nin amarin, saweni  
tu'narin inapusarinkeran sa'ini wenu u'shituwachina  
u'usawatun irahpa mahsawatun pa'nin tananke.

Wa'kimiachin nihsapasu ahkemiachin irahpa tuhka tenin nahtanpi.  
Shiarawatun kemapisu kiranman pe'perawatun u'marin. Nahpuru  
sa'ini pa'tatun iterin: ¡Ayun kiranchasu! Tenin sanapi.



Peike kiraman akukimasawatun  
sa'in nuntatun napurin: Ni'ke  
paya kiraman tehparawe,  
pa'a kanta u'shituku  
inapihkeran kehtawate  
yanumaa, iterin sa'in  
nuntatun. Inaran  
sa'in iterin: Inta  
kahu pineri ni'tun  
tananta pa'tupirawe  
ku ma'shateranta  
kenanawe, ni'kechi  
ahteke nipehaterawesu  
Ihpura a'naruahchin  
kiraman kenanawe, iterin sa'in.



Su'ini naputuwachina sanapisu kahpa kankankeran su'in apanitun  
naputerin: iAyun mahshu!, ni'kechi kiraman tehparan, pa'a ahpira  
wenu machinken u'uhke, inapihkeran kehtawate pa'a yanumate  
anpiate ka'a, iatarinkeran wenu mahkunsawatun su'in u'shiterin.

Napuatun tatamahshuya napurin: Anawatewatama',  
paku ahte munuke, ahte sha'weteke nipehpatuku inake  
anawate inkiarama', tenin tatamashu sha'witun.



## Sha'wehpatera penaninke ninunenesu'

**W**iri sha'we pihpituwachinpura pa'ne iminke penanin sha'nesu ina itehken inaran munuhken mahsawate pahsateru nu'wihken pihpiwachina inake tahshiramiachin i'waraya pahshitere'. Penaninke yapahshituwatera, insehinsuna sha'we pihpiterinpu ina shanpuke nuya pa'musawate pahshitere', kahpa shapun ya'wepachinawe nimuke pa'mure'. Nahpuruware penaninkesu akuterewachi. Inaputawate nuya tunputere ama ne'weri ya'kuntamarewe'. Nihsawatun ku nuhka kahpiterewe'. Mahshu nihpachina ku uhsha nihpiwe.

Na'kun nu'wihken pihpiwachina pa'chira'wake yuntunsawate, peike kemasawate i'sha inpiitere, inaran nani i'sha inpiitapasu inake pa'chira'wa akuitere'. Nani wa'kimiachin nihsapasu penanin nu'wi tachirutumarin.

Nahpuru we'ehta a'pisawate penanin pa'chira'wake nihsapasu mahsawate ate'nare', inaran insehinsuna sha'we pihpiterinpu inawachi akutere'. Ihsupuchin nituwatera chinichinihken sunimanen ya'weterin. Nahpuru ta'taresu akutuwatera a'naruahchin nuyahtere'. Nihpunawe nuya na'tere'.

Atari nuhtuwaru temeretuwachina penanin ite uhkuirawate nikatere', inaran i'sshake ya'muitawate inake uhputere'. Nani tawri naputuwatera temere tahkiri. Nihsawatun u'wairu mahtawachina penanin munu mahsawate ananan munupitare a'pesawate ya'ipi pei kunitere'. Inaputuwatera kañu wa'yanta penanin imesawatun a'naruahchin ta'arin. Tuhpi mamapayaru'sa sha'wituna.







# CARTA DEMOCRÁTICA INTERAMERICANA

## I La democracia y el sistema interamericano

### Artículo 1

Los pueblos de América tienen derecho a la democracia y sus gobiernos la obligación de promoverla y defenderla. La democracia es esencial para el desarrollo social, político y económico de los pueblos de las Américas.

### Artículo 2

El ejercicio efectivo de la democracia representativa es la base del estado de derecho y los regímenes constitucionales de los Estados Miembros de la Organización de los Estados Americanos. La democracia representativa se refuerza y profundiza con la participación permanente, ética y responsable de la ciudadanía en un marco de legalidad conforme al respectivo orden constitucional.

### Artículo 3

Son elementos esenciales de la democracia representativa, entre otros, el respeto a los derechos humanos y las libertades fundamentales; el acceso al poder y su ejercicio con sujeción al estado de derecho; la celebración de elecciones periódicas, libres, justas y basadas en el sufragio universal y secreto como expresión de la soberanía del pueblo; el régimen plural de partidos y organizaciones políticas; y la separación e independencia de los poderes públicos.

### Artículo 4

Son componentes fundamentales del ejercicio de la democracia la transparencia de las actividades gubernamentales, la probidad, la responsabilidad de los gobiernos en la gestión pública, el respeto por los derechos sociales y la libertad de expresión y de prensa. La subordinación constitucional de todas las instituciones del Estado a la autoridad civil legalmente constituida y el respeto al estado de derecho de todas las entidades y sectores de la sociedad son igualmente fundamentales para la democracia.

### Artículo 5

El fortalecimiento de los partidos y de otras organizaciones políticas es prioritario para la democracia. Se deberá prestar atención especial a la problemática derivada de los altos costos de las campañas electorales y al establecimiento de un régimen equilibrado y transparente de financiación de sus actividades.

### Artículo 6

La participación de la ciudadanía en las decisiones relativas a su propio desarrollo es un derecho y una responsabilidad. Es también una condición necesaria para el pleno y efectivo ejercicio de la democracia. Promover y fomentar diversas formas de participación fortalece la democracia.

## II La democracia y los derechos humanos

### Artículo 7

La democracia es indispensable para el ejercicio efectivo de las libertades fundamentales y los derechos humanos, en su carácter universal, indivisible e interdependiente, consagrados en las respectivas constituciones de los Estados y en los instrumentos interamericanos e internacionales de derechos humanos.

### Artículo 8

Cualquier persona o grupo de personas que consideren que sus derechos humanos han sido violados pueden interponer denuncias o peticiones ante el sistema interamericano de promoción y protección de los derechos humanos conforme a los procedimientos establecidos en el mismo. Los Estados Miembros reafirman su intención de fortalecer el sistema interamericano de protección de los derechos humanos para la consolidación de la democracia en el Hemisferio.

### Artículo 9

La eliminación de toda forma de discriminación, especialmente la discriminación de género, étnica y racial, y de las diversas formas de intolerancia, así como la promoción y protección de los derechos humanos de los pueblos indígenas y los migrantes y el respeto a la diversidad étnica, cultural y religiosa en las Américas, contribuyen al fortalecimiento de la democracia y la participación ciudadana.

### Artículo 10

La promoción y el fortalecimiento de la democracia requieren el ejercicio pleno y eficaz de los derechos de los trabajadores y la aplicación de normas laborales básicas, tal como están consagradas en la Declaración de la Organización Internacional del Trabajo (OIT) relativa a los Principios y Derechos Fundamentales en el Trabajo y su Seguimiento, adoptada en 1998, así como en otras convenciones básicas afines de la OIT. La democracia se fortalece con el mejoramiento de las condiciones laborales y la calidad de vida de los trabajadores del Hemisferio.

## III Democracia, desarrollo integral y combate a la pobreza

### Artículo 11

La democracia y el desarrollo económico y social son interdependientes y se refuerzan mutuamente.

### Artículo 12

La pobreza, el analfabetismo y los bajos niveles de desarrollo humano son factores que inciden negativamente en la consolidación de la democracia. Los Estados Miembros de la OEA se comprometen a adoptar y ejecutar todas las acciones necesarias para la creación de empleo productivo, la reducción de la pobreza y la erradicación de la pobreza extrema, teniendo en cuenta las diferentes realidades y condiciones económicas de los países del Hemisferio. Este compromiso común frente a los problemas del desarrollo y la pobreza también destaca la importancia de mantener los equilibrios macroeconómicos y el imperativo de fortalecer la cohesión social y la democracia.

### Artículo 13

La promoción y observancia de los derechos económicos, sociales y culturales son consustanciales al desarrollo integral, al crecimiento económico con equidad y a la consolidación de la democracia en los Estados del Hemisferio.

### Artículo 14

Los Estados Miembros acuerdan examinar periódicamente las acciones adoptadas y ejecutadas por la Organización encaminadas a fomentar el diálogo, la cooperación para el desarrollo integral y el combate a la pobreza en el Hemisferio, y tomar las medidas oportunas para promover estos objetivos.

### Artículo 15

El ejercicio de la democracia facilita la preservación y el manejo adecuado del medio ambiente. Es esencial que los Estados del Hemisferio implementen políticas y estrategias de protección del medio ambiente, respetando los diversos tratados y convenciones, para lograr un desarrollo sostenible en beneficio de las futuras generaciones.

### Artículo 16

La educación es clave para fortalecer las instituciones democráticas, promover el desarrollo del potencial humano y el alivio de la pobreza y fomentar un mayor entendimiento entre los pueblos. Para lograr estas metas, es esencial que una educación de calidad esté al alcance de todos, incluyendo a las niñas y las mujeres, los habitantes de las zonas rurales y las personas que pertenecen a las minorías.

## IV Fortalecimiento y preservación de la institucionalidad democrática

### Artículo 17

Cuando el gobierno de un Estado Miembro considere que está en riesgo su proceso político institucional democrático o su legítimo ejercicio del poder, podrá recurrir al Secretario General o al Consejo Permanente a fin de solicitar asistencia para el fortalecimiento y preservación de la institucionalidad democrática.

### Artículo 18

Cuando en un Estado Miembro se produzcan situaciones que pudieran afectar el desarrollo del proceso político institucional democrático o el legítimo ejercicio del poder, el Secretario General o el Consejo Permanente podrá, con el consentimiento previo del gobierno afectado, disponer visitas y otras gestiones con la finalidad de hacer un análisis de la situación. El Secretario General elevará un informe al Consejo Permanente, y éste realizará una apreciación colectiva de la situación y, en caso necesario, podrá adoptar decisiones dirigidas a la preservación de la institucionalidad democrática y su fortalecimiento.

### Artículo 19

Basado en los principios de la Carta de la OEA y con sujeción a sus normas, y en concordancia con la cláusula democrática contenida en la Declaración de la ciudad de Quebec, la ruptura del orden democrático o una alteración del orden constitucional que afecte gravemente el orden democrático en un Estado Miembro constituye, mientras persista, un obstáculo insuperable para la participación de su gobierno en las sesiones de la Asamblea General, de la Reunión de Consulta, de los Consejos de la Organización y de las conferencias especializadas, de las comisiones, grupos de trabajo y demás órganos de la Organización.

### Artículo 20

En caso de que en un Estado Miembro se produzca una alteración del orden constitucional que afecte gravemente su orden democrático, cualquier Estado Miembro o el Secretario General podrá solicitar la convocatoria inmediata del Consejo Permanente para realizar una apreciación colectiva de la situación y adoptar las decisiones que estime conveniente. El Consejo Permanente, según la situación, podrá disponer la realización de las gestiones diplomáticas necesarias, incluidos los buenos oficios, para promover la normalización de la institucionalidad democrática. Si las gestiones diplomáticas resultaren infructuosas o si la urgencia del caso lo aconsejare, el Consejo Permanente convocará de inmediato un período extraordinario de sesiones de la Asamblea General para que ésta adopte las decisiones que estime apropiadas, incluyendo gestiones diplomáticas, conforme a la Carta de la Organización, el derecho internacional y las disposiciones de la presente Carta Democrática. Durante el proceso se realizarán las gestiones diplomáticas necesarias, incluidos los buenos oficios, para promover la normalización de la institucionalidad democrática.

### Artículo 21

Cuando la Asamblea General, convocada a un período extraordinario de sesiones, constate que se ha producido la ruptura del orden democrático en un Estado Miembro y que las gestiones diplomáticas han sido infructuosas, conforme a la Carta de la OEA tomará la decisión de suspender a dicho Estado Miembro del ejercicio de su derecho de participación en la OEA con el voto afirmativo de los dos tercios de los Estados Miembros. La suspensión entrará en vigor de inmediato. El Estado Miembro que hubiera sido objeto de suspensión deberá continuar observando el cumplimiento de sus obligaciones como miembro de la Organización, en particular en materia de derechos humanos.

Adoptada la decisión de suspender a un gobierno, la Organización mantendrá sus gestiones diplomáticas para el restablecimiento de la democracia en el Estado Miembro afectado.

### Artículo 22

Una vez superada la situación que motivó la suspensión, cualquier Estado Miembro o el Secretario General podrá proponer a la Asamblea General el levantamiento de la suspensión. Esta decisión se adoptará por el voto de los dos tercios de los Estados Miembros, de acuerdo con la Carta de la OEA.

## V La democracia y las misiones de observación electoral

### Artículo 23

Los Estados Miembros son los responsables de organizar, llevar a cabo y garantizar procesos electorales libres y justos. Los Estados Miembros, en ejercicio de su soberanía, podrán solicitar a la OEA asesoramiento o asistencia para el fortalecimiento y desarrollo de sus instituciones y procesos electorales, incluido el envío de misiones preliminares para ese propósito.

### Artículo 24

Las misiones de observación electoral se llevarán a cabo por solicitud del Estado Miembro interesado. Con tal finalidad, el gobierno de dicho Estado y el Secretario General celebrarán un convenio que determine el alcance y la cobertura de la misión de observación electoral de que se trate. El Estado Miembro deberá garantizar las condiciones de seguridad, libre acceso a la información y amplia cooperación con la misión de observación electoral. Las misiones de observación electoral se realizarán de conformidad con los principios y normas de la OEA. La Organización deberá asegurar la eficacia e independencia de estas misiones, para lo cual se las dotará de los recursos necesarios. Las mismas se realizarán de forma objetiva, imparcial y transparente, y con la capacidad técnica apropiada. Las misiones de observación electoral presentarán oportunamente al Consejo Permanente, a través de la Secretaría General, los informes sobre sus actividades.

### Artículo 25

Las misiones de observación electoral deberán informar al Consejo Permanente, a través de la Secretaría General, si no existen las condiciones necesarias para la realización de elecciones libres y justas. La OEA podrá enviar, con el acuerdo del Estado interesado, misiones especiales a fin de contribuir a crear o mejorar dichas condiciones.

## VI Promoción de la cultura democrática

### Artículo 26

La OEA continuará desarrollando programas y actividades dirigidos a promover los principios y prácticas democráticas y fortalecer la cultura democrática en el Hemisferio, considerando que la democracia es un sistema de vida fundado en la libertad y el mejoramiento económico, social y cultural de los pueblos. La OEA mantendrá consultas y cooperación continua con los Estados Miembros, tomando en cuenta los aportes de organizaciones de la sociedad civil que trabajen en esos ámbitos.

### Artículo 27

Los programas y actividades se dirigirán a promover la gobernabilidad, la buena gestión, los valores democráticos y el fortalecimiento de la institucionalidad política y de las organizaciones de la sociedad civil. Se prestará atención especial al desarrollo de programas y actividades para la educación de la niñez y la juventud como forma de asegurar la permanencia de los valores democráticos, incluidas la libertad y la justicia social.

### Artículo 28

Los Estados promoverán la plena e igualitaria participación de la mujer en las estructuras políticas de sus respectivos países como elemento fundamental para la promoción y ejercicio de la cultura democrática.

# Banco del Libro

INSTITUCION EDUCATIVA:								
DEPARTAMENTO:				PROVINCIA:				
^DISTRITO:								
Año	Grado	Sección	Nombres y apellidos del alumno	Código*	Condición del libro ^			
					Recibí	Firma del Padre	Entregué	Firma del Padre

\* Código = Número de orden del alumno Condición del libro:

- A = Nuevo, completo, limpio, sin deterioro.
- B = Completo, se puede borrar algunas marcas, sin deterioro.
- C = Con marcas que no salen y con deterioros subsanables.
- D = Inutilizable, requiere reposición.




## ¿Cómo cuido y limpio mis libros?

- Forro mi libro con plástico o papel y le coloco una etiqueta.
- Limpio mi libro con una franela.
- Uso mi libro con las manos limpias y en lugares apropiados.
- Realizo las actividades en un cuaderno u hojas de trabajo, sin rayar ni escribir en mi libro.
- Evito doblar las puntas y que se manche con líquidos o dulces.

**¡Cuido los libros porque otro niño los utilizará el próximo año!**

# SÍMBOLOS DE LA PATRIA



BANDERA



CORO DEL HIMNO NACIONAL



ESCUDO

## Declaración Universal de los Derechos Humanos

El 10 de diciembre de 1948, la Asamblea General de las Naciones Unidas aprobó y proclamó la Declaración Universal de Derechos Humanos, cuyos artículos figuran a continuación:

**Artículo 1.-** Todos los seres humanos nacen libres e iguales en dignidad y derechos y (...) deben comportarse fraternalmente los unos con los otros.

**Artículo 2.-** Toda persona tiene todos los derechos y libertades proclamados en esta Declaración, sin distinción alguna de raza, color, sexo, idioma, religión, opinión política o de cualquier otra índole, origen nacional o social, posición económica, nacimiento o cualquier otra condición. Además, no se hará distinción alguna fundada en la condición política, jurídica o internacional del país o territorio de cuya jurisdicción dependa una persona (...).

**Artículo 3.-** Todo individuo tiene derecho a la vida, a la libertad y a la seguridad de su persona.

**Artículo 4.-** Nadie estará sometido a esclavitud ni a servidumbre; la esclavitud y la trata de esclavos están prohibidas en todas sus formas.

**Artículo 5.-** Nadie será sometido a torturas ni a penas o tratos crueles, inhumanos o degradantes.

**Artículo 6.-** Todo ser humano tiene derecho, en todas partes, al reconocimiento de su personalidad jurídica.

**Artículo 7.-** Todos son iguales ante la ley y tienen, sin distinción, derecho a igual protección de la ley. Todos tienen derecho a igual protección contra toda discriminación que infrinja esta Declaración (...).

**Artículo 8.-** Toda persona tiene derecho a un recurso efectivo, ante los tribunales nacionales competentes, que la ampare contra actos que violen sus derechos fundamentales (...).

**Artículo 9.-** Nadie podrá ser arbitrariamente detenido, preso ni desterrado.

**Artículo 10.-** Toda persona tiene derecho, en condiciones de plena igualdad, a ser oída públicamente y con justicia por un tribunal independiente e imparcial, para la determinación de sus derechos y obligaciones o para el examen de cualquier acusación contra ella en materia penal.

**Artículo 11.-**

1. Toda persona acusada de delito tiene derecho a que se presuma su inocencia mientras no se prueba su culpabilidad (...).

2. Nadie será condenado por actos u omisiones que en el momento de cometerse no fueron delictivos según el Derecho nacional o internacional. Tampoco se impondrá pena más grave que la aplicable en el momento de la comisión del delito.

**Artículo 12.-** Nadie será objeto de injerencias arbitrarias en su vida privada, su familia, su domicilio o su correspondencia, ni de ataques a su honra o a su reputación. Toda persona tiene derecho a la protección de la ley contra tales injerencias o ataques.

**Artículo 13.-**

1. Toda persona tiene derecho a circular libremente y a elegir su residencia en el territorio de un Estado.

2. Toda persona tiene derecho a salir de cualquier país, incluso del propio, y a regresar a su país.

**Artículo 14.-**

1. En caso de persecución, toda persona tiene derecho a buscar asilo, y a disfrutar de él, en cualquier país.

2. Este derecho no podrá ser invocado contra una acción judicial realmente originada por delitos comunes o por actos opuestos a los propósitos y principios de las Naciones Unidas.

**Artículo 15.-**

1. Toda persona tiene derecho a una nacionalidad.

2. A nadie se privará arbitrariamente de su nacionalidad ni del derecho a cambiar de nacionalidad.

**Artículo 16.-**

1. Los hombres y las mujeres, a partir de la edad núbil, tienen derecho, sin restricción alguna por motivos de raza, nacionalidad o religión, a casarse y fundar una familia (...).

2. Sólo mediante libre y pleno consentimiento de los futuros esposos podrá contraerse el matrimonio.

3. La familia es el elemento natural y fundamental de la sociedad y tiene derecho a la protección de la sociedad y del Estado.

**Artículo 17.-**

1. Toda persona tiene derecho a la propiedad, individual y colectivamente.

2. Nadie será privado arbitrariamente de su propiedad.

**Artículo 18.-** Toda persona tiene derecho a la libertad de pensamiento, de conciencia y de religión (...).

**Artículo 19.-** Todo individuo tiene derecho a la libertad de opinión y de expresión (...).

**Artículo 20.-**

1. Toda persona tiene derecho a la libertad de reunión y de asociación pacíficas.

2. Nadie podrá ser obligado a pertenecer a una asociación.

**Artículo 21.-**

1. Toda persona tiene derecho a participar en el gobierno de su país, directamente o por medio de representantes libremente escogidos.

2. Toda persona tiene el derecho de acceso, en condiciones de igualdad, a las funciones públicas de su país.

3. La voluntad del pueblo es la base de la autoridad del poder público; esta voluntad se expresará mediante elecciones auténticas que habrán de celebrarse periódicamente, por sufragio universal e igual y por voto secreto u otro procedimiento equivalente que garantice la libertad del voto.

**Artículo 22.-** Toda persona (...) tiene derecho a la seguridad social, y a obtener (...) habida cuenta de la organización y los recursos de cada Estado, la satisfacción de los derechos económicos, sociales y culturales, indispensables a su dignidad y al libre desarrollo de su personalidad.

**Artículo 23.-**

1. Toda persona tiene derecho al trabajo, a la libre elección de su trabajo, a condiciones equitativas y satisfactorias de trabajo y a la protección contra el desempleo.

2. Toda persona tiene derecho, sin discriminación alguna, a igual salario por trabajo igual.

3. Toda persona que trabaja tiene derecho a una remuneración equitativa y satisfactoria, que le asegure, así como a su familia, una existencia conforme a la dignidad humana y que será completada, en caso necesario, por cualesquiera otros medios de protección social.

4. Toda persona tiene derecho a fundar sindicatos y a sindicarse para la defensa de sus intereses.

**Artículo 24.-**

Toda persona tiene derecho al descanso, al disfrute del tiempo libre, a una limitación razonable de la duración del trabajo y a vacaciones periódicas pagadas.

**Artículo 25.-**

1. Toda persona tiene derecho a un nivel de vida adecuado que le asegure, así como a su familia, la salud y el bienestar, y en especial la alimentación, el vestido, la vivienda, la asistencia médica y los servicios sociales necesarios; tiene asimismo derecho a los seguros en caso de desempleo, enfermedad, invalidez, vejez u otros casos de pérdida de sus medios de subsistencia por circunstancias independientes de su voluntad.

2. La maternidad y la infancia tienen derecho a cuidados y asistencia especiales. Todos los niños, nacidos de matrimonio o fuera de matrimonio, tienen derecho a igual protección social.

**Artículo 26.-**

1. Toda persona tiene derecho a la educación. La educación debe ser gratuita, al menos en lo concerniente a la instrucción elemental y fundamental. La instrucción elemental será obligatoria. La instrucción técnica y profesional habrá de ser generalizada; el acceso a los estudios superiores será igual para todos, en función de los méritos respectivos.

2. La educación tendrá por objeto el pleno desarrollo de la personalidad humana y el fortalecimiento del respeto a los derechos humanos y a las libertades fundamentales; favorecerá la comprensión, la tolerancia y la amistad entre todas las naciones y todos los grupos étnicos o religiosos; y promoverá el desarrollo de las actividades de las Naciones Unidas para el mantenimiento de la paz.

3. Los padres tendrán derecho preferente a escoger el tipo de educación que habrá de darse a sus hijos.

**Artículo 27.-**

1. Toda persona tiene derecho a tomar parte libremente en la vida cultural de la comunidad, a gozar de las artes y a participar en el progreso científico y en los beneficios que de él resulten.

2. Toda persona tiene derecho a la protección de los intereses morales y materiales que le correspondan por razón de las producciones científicas, literarias o artísticas de que sea autora.

**Artículo 28.-** Toda persona tiene derecho a que se establezca un orden social e internacional en el que los derechos y libertades proclamados en esta Declaración se hagan plenamente efectivos.

**Artículo 29.-**

1. Toda persona tiene deberes respecto a la comunidad (...).

2. En el ejercicio de sus derechos y en el disfrute de sus libertades, toda persona estará solamente sujeta a las limitaciones establecidas por la ley con el único fin de asegurar el reconocimiento y el respeto de los derechos y libertades de los demás, y de satisfacer las justas exigencias de la moral, del orden público y del bienestar general en una sociedad democrática.

3. Estos derechos y libertades no podrán, en ningún caso, ser ejercidos en oposición a los propósitos y principios de las Naciones Unidas.

**Artículo 30.-** Nada en esta Declaración podrá interpretarse en el sentido de que confiere derecho alguno al Estado, a un grupo o a una persona, para emprender y desarrollar actividades (...) tendientes a la supresión de cualquiera de los derechos y libertades proclamados en esta Declaración.

“DISTRIBUIDO GRATUITAMENTE POR EL MINISTERIO DE EDUCACIÓN  
PROHIBIDA SU VENTA”